

東
華
續
錄

光緒一百七十一

臣朱壽朋敬編

臣章圭瑤恭校

十二月癸巳朔諭本月初七日朕恭詣 園丘告祭初八日 祫禘 大社 大雩 祭先期齋戒三日以

伸誠敬該衙門敬謹預備○諭朕欽奉 慈禧端佑康頤昭豫莊誠壽恭欽獻崇熙皇太后懿旨上年拳

匪變亂之際禁門以內承日本國土官嚴飭下士兵卒極力保護洵屬睦誼可風深宮甚為感悅著蔡鈞

轉達日本國皇帝申諭日本政府外務大臣調查士官下士官職姓名迅速電覆以便區別等級賞給寶

星○諭興學育才實為當今急務京師首善之區尤宜加意作養以樹風聲從前所建大學堂應即切實

舉辦著派張百熙為管學大臣將學堂一切事宜責成經理務期端正趨嚮造就通才明體達用庶收得

人之效應如何核定章程並著悉心妥議隨時具奏○諭翰林院為儲才之地平日並無公事從容清暇

正宜博通經濟期為有用之才以備國家任使著掌院學士將該衙門人員督飭用功於古今政治中西

算學均應切實講求務令體用兼賅通知時事而無習氣限五箇月後甄別一次由該掌院學士嚴行考

核分別優劣據實奏聞毋稍徇飾○諭兩廣總督陶模奏遵旨飭查廣西學臣劣跡據實覆陳一摺前據

御史黃曾源奏參廣西學政劉家模貪鄙各節當交陶模查辦茲據覆稱該學政嗜好甚深關防不嚴罔知檢束所至之處增索棚規供應並任聽船戶滿載私鹽被緝私廠拿獲該學政謂有衣物寄放在船電請查追一時傳爲笑柄等語學政爲一省師表當如何潔清自矢恪守官箴似此貪劣昭著實屬辜恩負職學政劉家模著卽行革職以示懲儆○甲午諭昨已有旨飭辦京師大學堂並派張百熙爲管學大臣所有從前設立之同文館毋庸隸外務部著卽歸入大學堂一併責成張百熙管理務卽認真整飭以副委任○諭此次賠款載在約章必須如期籌償萬不可稍涉遷延致失大信著各直省將軍督撫務遵照全權戶部會議辦法竭力籌措源源撥解按期應付不准絲毫短欠致生枝節倘或因循貽誤定惟該將軍督撫等是問懷之○諭現值時局大定亟應整頓路政以開利源著仍派王文韶充督辦路礦大臣加派翟鴻瑛充會辦大臣張翼勳同辦理其關內外鐵路事宜改派袁世凱接收督辦胡燏棻會同辦理務各認真籌畫實事求是以保利權○調李紹芬爲雲南布政使以林紹年爲山西布政使○甘肅新彊布政使文光因病乞休允之○魏光燾奏臣於光緒二十七年八月二十六日具奏滇省粵邊游匪酌擬辦法一摺欽奉 硃批知道了著卽督飭各員認真舉辦毋任日久蔓延爲要欽此仰見 聖主虛念邊陲之至意欽感莫名查原奏聲明滇省軍制苟簡非更定營制酌增行餉無以鼓勵軍心擬俟團營辦

好技併騰擲專案辦理現在前敵營務處黃鳳岐署廣南府劉鈞均已先後到差到任挑開布置惟習修綱一軍到邊年餘迄無功效察看終難得力不能不亟籌調換而滇軍積疲客星甚布實無全枝勁旅可遣自五月到任募立武威大營創練洋操會將省防綏靖各營添設教習棚夫一律改練雖為時未久昨經校閱步伐尙屬整齊事急相需因與撫臣李經羲熟商即委省防分統調補九江鎮總兵劉萬勝統率綏靖山中左右中四營並駐防邱北之綏靖山中營開赴廣南沿邊接替軍修綱一軍聯開布置以爲遊擊策應雕剿之師復飭前敵營務處黃鳳岐招募一營與劉軍合共六營俾不至過度軍薄並飭照陝西洋操隊大致規模將薪費員額切實核減吏定營制酌增餉糈以資飽騰均自本年十一月初一日起照章改編起支薪餉行軍仍每棚添設長夫發給棚帳鋤鋤斧略備規制俾得運動較靈可以應敵已飭剋期開拔擬劉軍到邊接防後飭令軍修綱暫回開化鎮總兵署任責成技併所部綱字各營屆時再行專摺奏辦其劉軍未到以前仍嚴飭軍修綱實力剿辦毋稍鬆懈得旨著即督飭認真訓練毋稍懈弛餘依議○乙未以潘效蘇爲甘肅新邰布政使監紳泰爲甘肅按察使○丙申諭前因御史黃曾源高榜先後奏參福建學政檀煥貧劣各款一摺當經諭令許應霖確查茲據查明擬奏該學政被參納賄得贓各節雖查無實據而去取不公關防不密因已異口同聲劣跡昭著實屬有玷官方檀煥著卽行革職

另片奏檳瓊按試泉漳等屬託詞集捐請飭如數交出等語卽著許應騷勒令該學政如數清繳歸入閩省賑捐款下備用不准稍有隱匿○諭朕奉 慈禧端佑康頤昭豫莊誠壽恭欽獻崇熙皇太后懿旨國家與列邦講信修睦一秉大公歷年以來召見大小臣工必以講求時務聯絡邦交爲訓勉每於州縣等官必諭以朝廷於教堂教士一視同仁務須加意保護並勸導百姓常使民教相安切勿猜嫌多事此等告誡不啻三令五申乃各該衙門人員能仰體朝廷德意者固不乏人其未能實力奉行著亦復不少嗣後務當屏除成見開誠布公擇善而從相接以禮自能中外輯睦共享昇平豈非安上全下之大幸至各省民情不一究竟良懦者多往往有宵小奸徒輾轉煽惑造言生事遂至釀成教案多被株連後悔無及是在地方官平日與民相親隨時開導必有民教爭訟聽斷持平無偏無激其有傳習邪教如白蓮八卦等名目藉端惑衆本爲法令所不容久已懸爲厲禁務卽申明曉示嚴切稽查有犯必懲以正人心而肅國紀著各該將軍督撫一體遵照辦理將此諭知之○諭上年拳匪內訌釀成巨禍皆由無識之王大臣縱庇邪術挾制朝廷職爲厲階其罪固無可追而當時愚妄之徒逢迎附和與該王大臣等彼呼此應議論齟齬淆亂觀聽貲屬貽害國家雖情節輕重不同要亦難逃洞鑒自應一併懲創以肅官常開缺都察院左副都御史何乃瑩翰林院侍講學士彭清藜編修王龍文江西贛州府知府連文冲陝西補用

知府會廉均著革職永不敘用○命書者在御前大臣上行走○命世鐸管理雍和宮事務○許祐身奏
本月初一日 召見科道臣跪聆 天語感激涕零竊以人才之興基於學校恭讀本年八月初二日
上諭令各省書院改設學堂十月間升任山東撫臣袁世凱陳奏東省學堂章程欽奉 諭旨通行仰見
皇太后 皇上勵精圖治深維國家作人之計必先儲之於學堂執兩用中莫名欽佩惟各省自奉
旨後辦理如何尚未據次第奏報竊緣籌費爲難未能同時推廣查東西各國學堂之費多者每年至千
萬餘兩少者數百萬兩日本海島之國亦八九百萬兩其籌款之法除由公家發帑外半由民間捐助而
成中國風氣初開學堂成效未著不有鼓舞安能振興溯歷年籌餉海防河工賑捐等事例皆緣經費無
出爲一時權宜之計援例舉行本年七月間欽奉 諭旨永遠停止澄清仕路正所以振拔真才惟值此
帑藏支絀學堂經費籌撥無從無米之炊勢難廣之疆吏臣愚以爲籌款積時徒切囑囑之望何如變通
事例爲剋期興辦之資擬請以學堂捐輸給予獎敘似與疊次 詔書及停捐 諭旨實有並行不悖者
蓋此項出資人員皆仰體 朝廷振興學術教育人才之盛心其急公好義固屬可嘉而明白事理知所
當務尤宜激勵之以爲方來之勸且以民間自有之財力聽民間自行舉辦歸地方官就近核明確數不
必由藩庫上兌及派員設局致多糜費庶有一分之財即得一分之用 國家推大公無私之意而成敬

教勸學之規官吏有稽察核助之權而絕耗折侵挪之弊撥之情勢當易集事謹擬獎敘章程五條以備
聖明採擇一凡紳商士庶能獨力創建學堂輸資至十萬兩以上者應由該省督撫奏明請 旨破格
錄用以示優異藉以甄拔人才其不及十萬者准照例定十成銀數給獎實官及十成貢監若干人已有
官階不願邀獎者許移獎子弟以免向隅一查封典銜翎本在常捐不停之例此項捐輸學堂人員如已
經得有實官願得封典銜翎應請即准部定新章核獎一凡現任候補各官捐資學堂者應請照例定十
成銀數給以升階花樣若資非已出係由勸募而來應視欸之多寡分別尋常異常勞績給予獎敘庶効
力者不至偏枯一凡捐助房屋書籍器具及學堂應用格致化學儀器等項請准照市價折合銀數給予
以上獎敘一凡興辦學堂之處所捐銀數及已用數目均令隨時呈明該管地方官立案其在省城者應
由該督撫核明具奏其在府廳州縣及鄉鎮市者應由該地方官核明詳報督撫奏獎以上辦欸各
於無可設法之中為援例變通之計良以舉行新政中外觀瞻非有人才無以興辦名器雖重較之於
國脈則輕創始甚難任之以眾舉則易他日英才輩出共策富強截止之期計之可行固非其他事例可
得援請准行 上諭御史許祐身奏勸立學堂懇請獎勵一摺各項捐輸請獎實官業經諭令永遠停止
該御史請變通事例擬以學堂捐輸給予獎敘實屬自紊其例所請著不准行○薩廉奏俄人在海參崴

創設滿文學堂以教俄童託延墨爾根城鄂倫春協領永壽爲教習現已派員署缺飭令前往報關○丁酉蠲免順直通州等八十二州縣錢糧旗租○己亥大祀 天於 圜丘 上親詣行禮○諭張人駿奏查明本年山東各屬秋禾被災情形懇恩分別蠲緩新舊錢漕一摺山東濟南等十府並臨清濟甯直隸州所屬各州縣衛所鹽場因本年陽雨失時秋禾皆多傷損並沿河一帶水衝沙壓堤堰佔挖各地及黃流漫溢被淹村莊若將應徵錢漕照常徵收民力實有未逮加恩著照所請所有被水成災之齊東等州縣所屬各村莊並被水被旱被風被蠶被沙被蝕不成災之濟甯等州縣所屬各村莊及堤壩佔壓各地畝均著照明被災輕重情形將應徵錢漕等項分別蠲緩以紓民力○庚子祭 社 稷壇 上親詣行禮○壬寅諭朕欽奉 慈禧端佑康頤昭豫莊誠壽恭欽獻崇熙皇太后懿旨元旦節皇帝率王公百官著在皇極殿行禮○諭朕欽奉 慈禧端佑康頤昭豫莊誠壽恭欽獻崇熙皇太后懿旨禮部奏元旦節儀一摺著照例行禮停止筵宴其在外公主福晉命婦並停止進內行禮餘依議○命直隸總督袁世凱參預政務處○茹岫奏燕郊等處行宮工程緊要請 旨飭交總管內務府趕緊派員查勘辦理得 旨著該衙門派員查勘仍遵前有力加簡省奏明辦理○癸卯欽奉 慈禧端佑康頤昭豫莊誠壽恭欽獻崇熙皇太后懿旨劉坤一著於明年開河時北行來京陛見張之洞著俟劉坤一同任後來京陛

見○諭陶模等奏據南雄州電稟法國柯教士面稱始興縣屬馬市墟居住民房之如教士不知被何人謀斃並致斃華人一名現尙未據該縣稟報當飭該州協同柯教士馳往查辦等語人命案件該地方官應卽勘驗稟報況事關交涉尤宜迅速辦理此次始興縣屬出有謀斃華洋二名重案該縣並不卽時勘報實屬玩泄著卽撤任先行交部議處並勒限嚴拿兇犯務獲訊明從重懲辦如逾限不獲定將該縣嚴懲處○甲辰李興銳奏江西近年水患頻仍推求其故皆由鄱陽湖日見淤淺而長江又昔蒐今狹窄

遭大雨疏洩不及便致四溢爲災卽如本年五月江省水災蔓延者四五十縣實則不過連雨十日而已夫十日之雨氣候常有未可諉爲天災也而水利不修患已如此脫遇霖霖匝月豈不徧成澤國何堪設想攷地志鄱陽湖古稱彭蠡闊四十里袤三百里西有章貢之水會南贛寧都吉袁臨瑞諸郡之流爲贛河一千里繞而左穿樵舍吳城入於湖爲西鄱陽湖東有軍峯之水會建撫諸郡之流爲撫河四百里繞而右穿楊家灘趙家圩入於湖爲東鄱陽湖兩湖又北駛百里始混於一爲彭蠡南跨南昌西接南康東抵饒州北達潯陽由湖口以出長江故爲通省水道門戶禹貢治水卽有彭蠡既豬之說其關繫緊要可知卽上年赴任適當殘臘水落之時察看湖水有深不盈一尺者湖中沙石積而成洲曲折紆環水性多爲所遏抑商賈帆檣亦以水淺滯滯不能暢行生計日困心竊憂之思欲設法疏濬而工役繁興耗費無

算際此民窮財盡安從得幾萬金錢撥諸水濱用是四顧徬徨一籌莫展未幾卽遭五月之水當時委員四出散賑勒限均飭其詳查受惠之由確考弭災之策咸謂非浚湖無以出斯民於昏墊臣再四思維與其年年被水歲歲籌賑竭盡官民之力而不能求一日之安誠不如勉籌鉅款大加修治庶幾一勞永逸且湖水淤滯商船不能通行商務亦無從振起是浚湖雖爲防水患起見亦未始非爲興商務張本也八月間奏文停捐實官督同司道核計所收籌餉新捐除上年辦理團防及撥付教堂賠款尙有所餘此款前經奏蒙 天恩全數留歸外用雖江省現在舉行新政興學練兵諸大端無一不需鉅款本屬力難兼顧惟浚湖一事既於民生商務均有關係自不得不先其所急臣當飭司道委員赴湖購製挖泥機器輪船數艘乘此時冬晴水淺將全湖淤墊之處分別挑挖其上游河道亦一律擇要疏治顧此時創辦布置粗定卽屆年終仍恐不能竟其全功當期諸來年次第辦理總期逐漸修治盡一分之力卽收一分之效其所需工役費用卽在籌餉捐款內支用不敢動撥正項錢糧得 旨著卽督飭疏濬核實辦理以惠民生○乙巳 上御乾清宮德國使臣穆默英國使臣薩道義法國使臣鮑渥俄國使臣雷薩爾日本國使臣內田康哉大西洋國使臣白朗穀覲見○諭前日召見之新選陝西鳳州鹽法道鄭思賢奏對顯預人欠明白著卽開缺○丙午 上詣 大高殿祈雪○以蔣良谷爲江南狼山鎮總兵○調倭懷額爲山

海關副都統○丁未以祥年爲正黃旗蒙古副都統○予浙江烏程縣孝女許興寶旌表○戊申予故大學士李鴻章於浙江建祠○安徽壽春鎮總兵郭寶昌卒予祭葬建祠戰功事蹟交國史館立傳○己酉內閣學士徐琪緣事革職○庚戌險軍機大臣等有人奏陝西郃陽縣知縣徐曹巧於鎮營半年之中連調三缺其署韓城時聽斷乖謬玩視人命文生張希鸞家務訟案擅行責罰文生杜某謀殺胞弟案勒令私和該縣因歲荒勸捐將捐事悉交委員州判謝樹棠經營妄作威福擅權納賄並有刑逼斃命之事又候補知縣王榮綬抽收芝川釐金橫徵苛罰興販漁利請飭查辦各等語似此貪劣苛虐如果屬實殊爲地方之害著升允按照所參各節確切查明據實參奏毋稍徇隱原片著鈔給閱看將此諭令知之○諭軍機大臣等有人奏特參屬民害政之知州請飭查辦一摺據稱直隸易州知州馮清泰當上年拳匪之變該州設有城防局防費所需派令閭閻鋪戶與富紳交納銀錢足有二十餘萬之數復於今年按戶攤捐勒令交錢非刑威逼並浮收錢糧私受賄賂縱容伊子等開設典鋪與民爭利各等語似此貪刻謬妄如果屬實殊爲吏治民生之害著袁世凱按照所參各節確切查明據實參奏毋稍徇隱原摺著鈔給閱看將此諭令知之○以張仁黼署兵部右侍郎○辛亥 上御乾清宮奧國使臣齊幹美國使臣康格德國使臣穆默英國使臣薩道義法國使臣鮑源俄國使臣雷薩爾日本國使臣內田康哉大西洋國使臣

白朗毅義國署使臣羅瑪納日國署使臣賈思理和國署使臣羅致比國署使臣賈爾牒暫見○以恭所
回鑒差務出力予隨辦鐵路差使道員王福昌等升敘有差○外務部奏工部為交涉總匯之處一切經
費勢難過簡從前總署設立之初月支款項向由戶部關領嗣因用度日繁又設立同文館學生教習薪
水等項所費不貲奏請在各海關徵收輪船船鈔項下暨招商局輪船船鈔項下各提三成並船牌費銀
兩解交應用以上各款名為同文館經費而歷年總署一切用費莫不取給於此收支相抵時形竭蹶本
年六月間政務處議擬總理衙門改為外務部設立專銀摺內聲明外務部既設專官自應優給養廉以
資辦公所有各經費即在本衙門應收三成船鈔及罰款項下開支如有不敷再由出使經費項下撥補
等因奉 旨允准欽此在案現在同文館業經奉 旨歸入大學堂所需經費前由戶部將華俄銀行息
款撥歸應用可以無須另籌嗣後各海關應解三成船鈔罰款銀兩自應作為戶部辦公專款其從前總
署月支戶部經費即應停支以清款目惟查戶部現當改章伊始支應紛繁不獨各堂司養廉繙譯官薪
水等項費用較鉅即如親見儀節購辦禮物製備寶星一切不時之需在在胥關緊要相應請 旨飭下
各省將軍督撫轉飭各關道將應解三成船鈔罰款銀兩務須按期解交戶部應用其以前欠解銀兩亦
須迅即補解以應急需等因奉 旨允行○壬子諭禮部左侍郎榮惠奏敬舉人才一摺據稱安徽試用道蔡

世昌才具優長歷爲各疆臣所委任等語蔡世昌改官道員本年曾經召見人甚平常該侍郎輒稱爲劉坤一張之洞吳大澂等所任用率意鋪張語多不實似此妄行保薦何以激勵人才榮惠著傳旨申飭○諭錫賈奏查明豫省蘭儀考城二縣本年黃河漫溢成災及各屬因風雹旱潦被災請分別蠲緩新舊錢漕開單呈覽一摺河南上年秋冬之交雨雪稀少入春以後被風被旱被淹被雹各屬秋禾受傷收成均形歉薄若將應徵錢漕照常徵收民力實有未逮加恩著照所請所有蘭儀考城兩縣成災五六七八九分各村莊暨勘不成災之河內等六十州縣所屬各村莊均著照勘明被災輕重情形將應徵新舊錢漕分別蠲緩以紓民力○諭張之洞等奏查明湖北各州縣被淹受旱輕重情形懇恩分別蠲緩新舊錢糧一摺湖北黃梅等縣本年五月間暴雨連朝江漢並漲田廬禾稼大半淹沒入秋後雨澤稀少乾旱成災若將應徵錢糧照常徵收民力實有未逮加恩著照原奏所開黃梅等各州縣村莊頃畝應蠲緩銀兩各數分別蠲緩另摺奏黃梅等縣應徵漕糧請分別緩徵等語著照所請緩至二十八年秋後分限帶徵其原限節年漕糧並著遞限一年帶徵以紓民力○癸丑諭軍機大臣等奕謨等奏幫升承運米石押報搶失請飭查辦一摺據稱西陵官兵應食粟米指撥山東漕糧上年運至雄縣被搶餘米存在滄州等處當卽先後派員密查顯有官弁藉端侵蝕情事請飭直隸督臣山東撫臣遴委委員前往確查等語事

關兵食而押運員弁膽敢乘亂聚混稟報顯有折價盜賣情事著袁世凱派人驗確切查明參辦嚴追據
寶覆奏原摺著鈔給閱看將此諭令知之○戶部左侍郎吳樹梅因病乞休允之○甲寅諭朕欽奉 慈
禔端佑康頤昭豫莊誠壽恭欽獻崇熙皇太后懿旨大學士榮祿奏滯陳下情懇請開去各項重要差使
一摺該大學士公忠體國謹慎小心久爲朝廷所信任上年拳匪之變家口紛呶該大學士獨能堅持定
見匡扶大局厥功甚偉今雖時事粗定而元氣大傷除弊更新百端待理正當同心戮力共濟艱難宮廷
振厲不遑孜孜求治該大學士受恩深重更何忍置身事外獨使宵旰憂勞揆諸鞠躬盡瘁之義於心安
乎所請著不准行○諭錫良奏已故知州虧短交代請飭查辦等語河南已故署裕州知州林兆基任內
虧短正雜等項一千八百三十餘兩又欠常年穀價三千七百七十餘兩業經奏參革職勒追乃該家屬
避匿絲毫未解實屬膽玩著順天府及各直省督撫查拿該故員家屬解豫嚴追並著徐會澧陳肇錫良
將該故員原籍家產及歷過任所資財一併嚴密查封查備抵以重庫欸餘著照所議辦理○授孫家鼐爲
大學士○調楊儒爲戶部左侍郎轉梁仲衡爲工部左侍郎以秦綬章爲工部右侍郎○命劉鴻璣爲軍
機大臣○蠲免安徽泗州等三十八州縣錢糧○乙卯諭朕欽奉 慈禧端佑康頤昭豫莊誠壽恭欽獻
崇熙皇太后懿旨我朝深仁厚澤淪浹寰區滿漢臣民朝廷從無歧視惟舊例不通婚姻原因入關之初

風俗語言或多未喻是以著爲禁令今則風同道一已歷二百餘年自應俯順人情開除此禁所有滿漢官民人等著准其彼此結婚毋拘泥至漢人婦女率多纏足由來已久有傷造物之和嗣後摺紳之家務當婉切勸導使之家喻戶曉以期漸除積習斷不准官吏胥役藉詞禁令擾累民間如遇選秀女年分由八旗挑取不得采及漢人免蹈前明弊政以示限制而恤下情將此通諭知之○諭交涉事宜最爲重要現在振興庶政尤應博採所長出洋游歷人員若能於各國政治工藝潛心考究切實請求庶幾蔚爲通才足備國家任使近來各省士子留心時務多赴各國學堂肄業惟宗室八旗子弟風氣未開亟宜廣爲造就著宗人府八旗都統選擇各旗子弟年在十五歲以上二十五歲以下志趣正大資質聰明體氣強壯者造冊開送軍機處進呈聽候派員覆覈挑選給資遣赴各國游學藉資歷練而廣見聞用副朝廷圖治育才至意○調張百熙爲吏部尚書張寶華爲刑部尚書以呂海寰爲工部尚書陸潤庠爲左都御史朱祖謀爲禮部右侍郎○丙辰諭俞樾三奏查明安鄉等縣州縣衛本年夏間湖河泛漲低窪地畝悉被淹沒收成均形歉薄若將應徵錢漕蘆課等項照常徵收民力實有未逮加恩著照所請所有安鄉等縣成災六七八九十分各村莊暨勘不成災之武陵等縣所屬各村莊均著照勘明被災輕重情形將應徵錢漕蘆課分別蠲

緩遞緩以紓民力○諭近來各省制錢缺少不敷周轉前經福建廣東兩省鑄造銅圓輪廓精良通行市肆民間稱便近日江蘇仿照辦理亦極便利并可杜私鑄私銷之弊著沿江沿海各督撫籌款仿照創就各該省搭鑄通行至京師制錢亦應照辦卽著福建廣東江蘇等省將所鑄銅圓趕緊各解數十萬圓投交戶部頒發行使期於利用便民以維國法○劉坤一等奏參知縣交代欠款延不清解請飭拿問監追查抄備抵一摺已革江蘇候補知縣王豫熙於前署上海縣任內欠解瀏河工費銀一萬三百八十二兩零又欠解捐項等款爲數甚鉅業經奏參革職勒追現在逾限未交實屬疲玩已極著劉坤一恩將將該革員王豫熙拿問監追並著浙江巡撫任道鎔將其原籍海鹽縣並寄居之海甯州所有家產一併嚴密查抄備抵以重庫款該部知道○諭岑春煊奏查明陽曲等縣州縣夏秋被災各屬請蠲緩新舊錢糧開單呈覽一摺山西陽曲等縣州縣當歷年積歉之後本年又復被旱被雹被水田畝受傷收成均形歉薄著將應徵錢糧照常徵收民力實有未逮加恩著照所請所有陽曲等四十三縣州縣均著照勘明被災輕重情形將應徵新舊正雜錢糧分別蠲緩遞緩以紓民力○命榮祿爲文華殿大學士王文韶爲文淵閣大學士孫家鼐爲體仁閣大學士○丁巳諭岑春煊奏山西本年續報夏秋被災各屬再懇蠲緩停展新舊錢糧等項一摺山西永濟等縣秋禾被淹被旱民情拮据若將新舊錢糧照常徵收民力實有未

速加恩著照所請將永濟陽曲平陸太原等縣新鑄錢糧歸入前案一併蠲緩停展以紓民力○以那桐署外務部左侍郎○命侍讀學士朱益藩編修鄭沅在南書房行走○呂海寰奏查和蘭南洋各島開埠最早華民之往彼謀生者亦最夥而噶羅巴一島尤爲薈萃之區其屬有三十餘府寄居之華民不下六十萬人和尙優待後因迫令入籍遂致鼓噪被戕者幾及十萬人殺戮之慘暗無天日厥後苛政繁興種種凌虐擢髮難數推原其故以中國未經設立領事以保衛之也查前任出使大臣薛福成許景澄等迭經函商總理衙門暨北洋大臣兩廣總督籌商保護之法均以設立領事爲最要關鍵惟中國與各國訂立通商條約當時未悉洋情又視設立領事爲無足重輕故約內祇載各國可於中國各通商口岸設立領事未載中國可在各國口岸設立領事明文以致中國欲在各國口岸添設領事無不多方阻止雖俄續約有中國欲在俄羅斯京城或別處設立領事官亦聽中國之便德續約有凡德國各處准各國領事官駐紮者中國亦可派員駐紮中法越南條約有中國可在河內海防二處設立領事官各等語乃至今未能設立惟秘魯巴西日本墨西哥條約有彼此均可設立領事一款中國業已擇要舉行而中國與和蘭所訂之約未經聲明和外部卽以此阻撓噶羅巴各島添設領事屢議未成職是之故臣充總理各國事務衙門章京時卽習聞之嗣於光緒二十三年欽承 簡命出使德和兩國時以此事爲念迫於洋後

至新嘉坡其時駐紮新嘉坡總領事候選道張振勳過船謁見以該道熟悉南洋各島情形卽詢以僑寓和屬嗎羅巴等處之華民和人相待如何據稱和國國家尙無惡意惟嗎羅巴等處之地方官擅立苛政待我僑寓之華民奴隸不若不與各國人一律看待華民之獨受陵虐皆因中國未設領事之故等語臣查檔案光緒二十三年兩廣總督張之洞曾派員藉查訪商務爲名探訪待華民之實爾時和廷頗萌疑忌經許景澄力爲剖白只以推廣商務爲詞始免饒舌是領事之設彼不樂從情節顯然旋有寓和職商陳仕林公稟詳陳和屬虐待各情到任後亦接有嗎羅巴華商等密稟近來苛虐情形更甚於昔急迫控訴並聲明不敢露出姓名恐被族聞之以後卽難在該處經商云云臣查前後各稟內稱有所謂瑪腰者甲必丹者雷珍蘭者俱係管理華人之名目和官以華人之生長於此者充之該瑪腰等仰承和官恩惠初不過承命行事繼且擅作威福甘爲厲階設禁斂錢無所不至種種不法皆瑪腰等主之以中國之人欺中國之民可謂喪心昧良然其入和籍已久漸不知爲我天朝之百姓固無足怪其所設苛政如華人初到和地概入公堂問過口供報明註冊或赴各鄉營生須和官批准方許前往嗣忽下不准華民居鄉之例限二十四點鐘立將生意產業賤售於土番逾期則罰銀後仍行逐出將平日之產業片刻卽消歸烏有一時華民扶老攜幼哀聲動地而和人毫無憐惜之意此其一也又華人到和屬地向來

須有和官憑照方准登岸有此憑照即可前往無阻近又變立新例凡登岸者無論有無憑照登岸後地方官帶至衙門用繩圈歸一處挨爲查點其老客有原日出口憑照者即放行若新客則統飭差役驅入繩圈內一體帶入瑪腰公館逼令映像有人擔保者始爲放出如竟不得擔保則帶至地方官衙門上鎖刑具俟有輪船再驅出境華民奔走數十萬里以謀衣食甫到境無辜被刑川資用罄依賴無門身異域爲之慘然此又其一也又華人在此處貿易必須先由此處領一路票除使費不計外應繳印花銀若干既到彼處又須在彼處掛號再繳銀若干如一日到三處五處貿易則兩頭繳費亦須三次五次萬一掛漏查出後從重加罰必使其虧本而後已而多方留難耽延時刻猶其小焉者也此又其一也又華人遇有詞訟之事審費照西人至多之例核算科罪又照土番至重之例辦理縱令理可得直而追回銀數往往不敷狀師之費因此含冤負屈者不可勝計此又其一也又華人經商和闔地所有家資產業雖妻子兒女不得私相授受如遇身故者資產即歸入公所當初設此公所其章程由華人訂定事務由華人經理必俟其子孫前來領取均有桑梓之誼故無不竭力經營也今則樞歸和政府華人之子孫執遺囑援照章程向公所領取者和官必多方挑剔反復延宕如無遺囑或抱病不及遺囑於親屬者則所有產業概沒入官雖叔姪親串不能過問此又其一也又華人在日里地方承種片葉往往有奸販誘惑無知

愚民出洋販賣壯者身價五六十元或八九十元不等弱者或三四十元訂立字據以三年爲期即以種茶之息償其身價入國後不准擅自出入雖父兄弟不能晤面於是剝扣工資盤剝重利諸弊叢生工人莫不垂頭喪志忍氣吞聲呼籲無門且升科闢地各國人民皆得購地種茶獨華人不能此又其一也以上苛虐各節已令人憐不忍聞正擬設法向和外部論理聞忽新嘉坡商人寄呈英文報一紙內載班喀地方華人在錫礦各廠作工苦不可言礦廠大半在山溪山水下流廠主不設抽水機華工日在水下既患潮濕又係楊腹故染病最易況天氣炎熱異常時症不息死者枕藉廠主開設店舖逼勒華工在此購買什物質極劣價值極昂所得蠅利日見不敷偶有急需支借工資按月納息支借一兩納五錢故若輩雖勤不免瀕食華工積憤已久遂聚集三百餘人名曰三指會猝然起事廠主先知消息遂開鎗掃擊死傷者不計其數登時逃散地方官拿獲多名窮請再三實因不堪廠主及監工人苛待所致允爲申理始照舊作工華工素循規矩若非所待太苛必不至於啟釁等語臣展閱之下必然心傷竊思華民僑寓南洋各島向以作工爲業平日已不勝其苦茲復任意陵虐其情形與古巴之夏灣拿招工同一慘忍是領事之設斷難再緩臣迭與和外部大臣樸福爾再三申論并譯錄商稟及新報苛待情形詳細述之并備文照會請其允設領事以保我僑氓生計乃該外部以事屬藩部不能作主爲詞并云華工在彼

處相安已久決無苛待情事不可聽信一面之辭且擬設領事必須先立專約纔能商辦意在延宕又經
臣反覆開導始允商之藩部派員往查再爲徐議嗣聞和藩部派香港總領事得羅在信前往查看臣當
卽致函該總領事請其相助俾價和屬各島華工之願乃日久無信迭經臣函催和外部速覆延緩數月
始於去年二月間據和外部大臣照覆聲稱華民稟訴各節多有不實不盡之處凡各國設立領事應管
分內之事稽查本國商務至詞訟等事不能徑達國家須由駐和使臣與和政府商辦各領事無干預之
權華民首領雖有協理地方之責向由該處總督自行選派現藩部所查各處寓居華人共四十七萬餘
人且大半已入和籍查雅瓦地方所有華民入和籍者較之不入和籍華民多至十倍等因前來臣接此
照覆後又經照會和外部以華民流寓和屬南洋各島挾鉅資爲商者固不乏人而窮無所依游手好閒
者亦所在多有若設領事在彼亦可隨時彈壓排解不致貽地方以隱患於和屬亦屬有益新嘉坡小呂
宋等處中國早經設有領事卽和屬之噶羅巴一島而論歐美各大國無不設有領事而中國尙未設立
中國在別國已設有領事而和屬尙在闕如且和國既准別國設立領事亦應准中國設立況中國早經
准和國在中國設立換請施報之常似不應拒絕中國況中興和通商最早修好已數百年若不准中國
在和屬設立領事按之公法殊欠平允若允中國在噶羅巴一帶設立領事自應按照各國通例適如領

事之分際而行毋庸多慮等語與之反覆辯論嗣因延宕日久去年夏初本擬專赴和都與該外部再行面商和外部大臣樸福爾人尙和平與臣亦屬浹洽其覆文內並無不准設立字樣正可相機因應擬先派員游歷以專查商務爲名俟查覆得實彼自無可置喙而後領事之設可成不意五月以後變故迭出彼此隔閡事遂中止殊爲可惜追公約議成後和外部大臣樸福爾告退新任外部大臣尙未接洽臣已奉命內渡此項與外部屢次商設領事已有端緒之實在情形也伏念我國家保赤爲懷僑寓和屬華氓既受苛虐亟應設法保護以救此無告之窮民而保護之法非先設領事無從下手查和屬島嶼林立應設領事之處有七如噶羅巴三寶瓏泗里孟望加錫勿里洞日里文島各處均關緊要爲今之計萬難各處遍設惟噶羅巴一島設立總領事一員爲萬不可緩之圖但既設領事必須寬籌經費又必擇清廉公正者往任其事方能聲勢聯絡於事有濟有所謂就地籌款華民樂於輸將者臣恐不得其人藉端勒索其害更甚於瑪腰則華民之冤屈仍不得伸且貽外人以口實矣說者謂現在庫款支絀經費何從籌措臣以爲若仿照新嘉坡章程辦理一年不過萬餘金足可布置在朝廷國帑雖絀似乎區區之數尙不難籌查南洋僑居之華民大半閩廣之人居多或令閩廣督撫另籌的款撥充噶羅巴總領事經費之用在各督撫饑源爲懷當亦哀此部下之窮黎爲之援手一救也近來僑寓南洋各島之華民因中

國水旱偏災捐集鉅款踴躍樂輸其急公好義實有尊君親上之忱又何忍其顛連困苦坐視數十萬人
之性命而漠不關心哉查泰西各國無論其商務多寡無不以設立領事爲急務不但寓居之氓得領事
之保衛而民氣益壯并可坐探事機密報本國其有關於商務大局實非淺鮮臣現將交卸使篆念我華
民流寓於和屬之南洋各島者六十餘萬人徒受和人苛虐而不能拯之於水深火熱之中寤寐難安臣
心實爲抱疚現在各國重訂商約正可及時預爲籌助凡各國通商口岸及各島嶼華民羣集之處
中國查看情形隨時均可商設領事庶不至臨事掣肘可否請 旨飭下商約大臣會同外務部趁此與
和蘭修訂條約之時與和蘭駐京使臣商量增入中國可在噶羅巴等處設立領事之條一面由出使和
國大臣與和外部妥議辦法內外通力合籌彼見我志已堅當可就我範圍而僑寓華民遠被 聖澤其
歡欣鼓舞有非可以言語形容者也下外務部議奏○袁世凱奏 前據山海關道明保稟稱接奉外務
部行知常關徵稅事宜改歸新關稅務司兼辦作抵償款等因查山海關經徵常稅每年例定正額銀六
萬一千六百餘兩盈餘銀四萬九千四百餘兩加增盈餘銀八萬兩又整頓稅務化私爲公曾於營口續
增盈餘一項約銀七千兩共計每年徵收銀十九萬八千餘兩內每年應支山海關八旗兵餉官俸米折
養賑等款銀五萬九千餘兩應解部庫官飯等款銀一千七百餘兩奉天軍餉銀一萬餘兩內關官飯資

助銀四千二百兩奉天各官養廉銀一千八百餘兩奉天總督巡撫學政養廉銀一萬六千兩內務府經費銀二萬六百餘兩漕船免徵例准作抵銀七萬餘兩均係內銷之款歷屆關期分別造冊報部統計一年額徵數目係數支費即在暢收之年所餘亦屬無幾營口常關現議改歸稅務司兼辦雖五十里外各稅口仍歸該道經徵然營口乃通商巨埠百貨蕃萃之區往年所收常稅約居徵額十之八九其餘水陸各口不過十之一二今將收數最旺之口劃歸新關抵還價款核計常稅應支應解各款不敷甚鉅查上年常洋兩關同時停徵所有該兩關應解各款業已詳經咨明戶部另籌惟旗練各餉兵食所關仍為設法籌措按月照發本年開河後將山海關大橋廠錦州暨雙土龍窩各稅口派員試辦涓滴歸公商賈寂寂所收稅項尙不足山海關八旗官兵俸餉之用而奉天各官養廉皆為辦公所需亦未敢因常稅無著置之不顧爰將上年七月以前關徵存款內通融挪墊次第批解現在養廉一項已解至本年冬季山海關八旗俸餉米折各項約可放至本年年底此後委實無款籌墊應請由部另籌等情正在核辦間復據該道稟稱接准山海關副都統富順鈔摺咨會該關八旗官兵俸餉等項銀兩已奏請仍留該道經徵正稅溢餘二項就近支領等因覆查營口常稅劃歸稅務司兼辦所收正額盈餘各項均應抵作價款勢難照舊撥解雖五十里外小口尙歸該道經徵而沿途河口如山海關錦州蓋州大孤山天橋廠以及各邊

門分卡往年統計不過徵銀四萬餘兩除去該署辦公經費委員薪水津貼各局卡房租吏役工食等項已屬餘款無多即使全數留山海關八旗官兵俸餉尚恐不敷況兵燹之餘商民凋敝以後稅收能否照常未敢逆料且歷年常稅項下應解之款不俾山海關八旗官兵俸餉一項尚有內務府經費奉天養廉軍餉內閣部科餉銀孰非辦公要需若不預請另籌將來撥解無款獲戾滋重詳請具奏等情前來臣查山海關常稅歷年以營口收數為最旺該口常關改歸稅務司兼辦五十里以外沿海沿邊各口雖仍歸該道經徵惟地面蕭索客貨稀少所收稅項僅額徵十成中之一二除去辦公經費及員薪役食房租等項餘款無多山海關八旗俸餉等項每年需銀五萬九千餘兩之多若仍令該道照舊支發難為無米之炊仰懇 天恩俯准山海關常稅內應支該關八旗官兵俸餉等項及其餘應解各款自來年正月起由部另行籌撥以免貽誤至該道經徵各口常稅飭俟關期屆滿報明實數扣留本關經費餘款聽候部撥下戶部議奏○戊午 上幸 中正殿閱跳步扎○諭軍機大臣等袁世凱奏武衛中軍孫萬林所部馬步各營旗可否遣散抑或由部撥款等語著袁世凱咨商張人駿酌給恩餉將該軍妥為遣散以節餉需將此各諭令知之○己未以山東章邱縣陳家窖合龍出力予知府張毓琦等升敘有差○蠲免江甯上元等三十四州縣江蘇長洲等二十七州縣浙江仁和等二十七州縣錢糧○庚申歲暮怡祭 太廟

上親詣行禮○賞給和碩額駙扎拉璦阿之子世襲恩騎尉富克錦額駙品級○辛酉諭土默特郡王銜多羅貝勒色靈那木濟勒旺寶阿喇科爾沁郡王銜多羅貝勒巴咱爾古哩第著加恩賞戴三眼花翎敕罕固山貝子色靈都布翁牛特鎮國公旺布林沁著賞用紫綢翁牛特親王銜多羅都楞郡王咱門巴勒諾爾布扎喇特鎮國公喇勒瑪扎布蘇呢特輔國公特木爾巴林二等台吉色丹那勒旺寶著在御前行走○是年會計天下民數共四萬二千六百四十四萬七千三百二十五名口○英吉利國使臣寶訥樂調駐日本薩道義繼之○統計出口貨直銀一萬五千八百九十九萬六千七百五十二兩進口貨直銀二萬一千一百七萬四百二十二兩相抵虧五千二百七萬三千六百七十兩凡徵貨稅銀二千二百八十七萬三千九百八十六兩

光緒二十八年壬寅春正月壬戌朔寅刻 上詣 奉先殿行禮辰刻 慈福端佑康頤昭豫莊誠壽恭欽獻崇熙皇太后御皇極殿 上率王公百官行慶賀禮御中和殿受禮太和殿受賀巳刻詣 壽皇殿大高殿行禮停止進宴○癸亥諭上年順直各屬災荒處所業經降旨分別豁免其文安香河等州縣被災各屬經袁世凱奏請分別蠲緩糧租亦經照准惟念今春青黃不接之時民力必形拮据實深軫念著該督督飭藩司迅速查勘應如何酌量辦理之處分晰具奏候旨施恩用副賑端布圖嘉惠綏輯至

意○甲子 上詣 壽皇殿行禮○諭朕欽奉 慈禧端佑康頤昭豫莊誠壽恭欽獻崇熙皇太后懿旨
三月初六日予奉皇帝祇謁 東陵所有應行事宜著各該衙門敬謹預備其由京啟鑾及御道一切前
已降旨務從簡省著袁世凱核實撙節所有經費准其作正開銷絲毫不得攤派民間以免擾累其餘隨
扈各事宜均應力求簡約俟御前大臣軍機大臣內務府大臣核議覆奏再降諭旨○乙丑諭朕欽奉
慈禧端佑康頤昭豫莊誠壽恭欽獻崇熙皇太后懿旨乘輿駐蹕陝西幾及一載前因地方災歉疊經頒
發內帑並豁免錢糧小民諒可不致失所惟聞去冬雪澤稀少該省又屬瘠苦之區雖念瘡中良深軫系
著陝西巡撫升允查明各屬災後情形再將應完錢糧量予蠲緩即行詳晰具奏候旨施恩用示朝廷之
惠元元有加無已之至意○蠲免山東濟寧等二十六州縣錢糧○丁卯張百熙奏 於上年十二月初
一日奉 上諭興學育才實為當今急務京師首善之區尤宜加意作養前所建大學堂應即切實舉辦
著派張百熙為管學大臣將學堂一切事宜責成經理務期端正趨向造就通才應如何裁定章程並著
悉心妥議隨時具奏等因欽此奉 命以來 臣當即悉心考察夙夜撙思一面查勘現在情形一面豫籌
將來辦法計惟有欽遵 諭旨端正趨向造就通才以仰副 朝廷興學育才之至意惟是從前所辦大
學堂原係草創本未詳備且其時各省學堂未立大學堂雖設不過略存體制仍多未盡事宜今值 朝

廷銳意變法百度更新大學堂理應法制詳盡規模宏遠不特爲學術人心極大關鍵亦卽爲五洲萬國所共觀瞻天下於是審治亂驗興衰辨強弱人才之出出於此文明之係係於此是今日而再議舉辦大學堂非徒整頓所能見功竊賴開拓以爲要務斷非因仍舊制敷衍外觀所能收效者也惟念日本無學問粗識事情當國家圖治之時正臣子致身之日固不敢安於簡陋亦何至稍涉鋪張誠深悉唐虞三代古世所以致太平極治之規又親見歐美日本諸邦所以變通興盛之故確有憑據諒不虛誣今日中國若議救敗圖存當此竟無辦法如使成規坐臨收效無從計一身不足惜所恐上無以對聖訓下無以塞羣望見輟外人更傷國體成敗之故罔不隨之下既見及此敢不直陳用特粗擬推廣辦法五條敬爲我皇太后皇上縷晰言之一辦法宜豫定也查各國學堂之制大抵取幼童於蒙學卒業之後先入小學堂三年卒業乃升入中學堂如是又三年乃升入高等學堂如是又三年乃升入大學堂以中國準之小學堂卽縣學堂也中學堂卽府學堂也高等學堂卽省學堂也今雖奉明諭令各省府州縣編設學堂至今奏報開辦者尙無幾處是目前並無應入大學肄業之學生而各省開辦隨時又不知何年而學堂方可一律辦齊又何年而學生方能次第卒業通融辦法惟有暫且不設專門先立一高等學校功課略倣日本之意以此項學校造就學生爲大學之預備科一面由臣請旨催辦各省學堂三年之

後豫備科所造人才與各省省學堂卒業學生一併由大學堂考取升入專門肄業所有豫備科功課謹遵繹本年變通科舉舊設學堂歷次 上諭分爲二科一曰政科二曰藝科以經史政治法律通商理財等事隸政科以聲光電化農工醫算等事隸藝科惟取入豫備科肄業學生亦須平日在中學堂卒業者方能從事查京外所設學堂已歷數年辦有成效者以湖北自強學堂上海南洋公學爲最此外則京師同文館上海廣方言館廣東時敏學堂浙江求是學堂開辦皆在數年以上餘若天津高等學堂之已散學生出洋游歷學生外洋華商子弟亦多合格之才再由各省督撫學政就地考取各府州縣高才生咨送來京由管學大臣覆試如格方准送入大學堂肄業其外省考試之法由大學堂擬定格式頒發各省照格考取以免歧異學生入學之後俟三年卒業由管學大臣擇及格者升入大學堂正科有不及格者分別留學撤退恭查本年 上諭已有各省選派出洋學生學成回華由督撫外務部考驗之後候 旨分別賞給舉人進士明文大學堂豫備科卒業學生與各省省學堂卒業學生功科相同應請由管學大臣考驗如格擇尤帶領引 見候 旨賞給舉人升入正科又三年卒業再由管學大臣考驗如格帶領引 見候 旨賞給進士如此辦法十年之後所造就者定多可用之材以之綜理庶務當無不足富強之基必立於此惟是 國家需才孔亟士大夫求學甚殷若欲收急效而少棄材則又有速成教育一法

應請於豫備科之外再設速成一科速成科亦分二門一曰仕學館一曰師範館凡京員五品以下八品以上以及外官候選等因事留京者道員以下教職以上皆准應考入仕學館舉貢生監等皆准應考入師範館仕學館三年卒業學有成效者請准由管學大臣考驗後擇其優異定爲額數帶領引見如原係生員者准作貢生原係貢生者准作舉人原係舉人者准作進士均候旨定奪准作進士者給予准爲中學堂教習文憑准作舉貢者給予准爲小學堂教習文憑蓋豫科之學生必取其年歲最富學術稍精者再加練習儲爲真正合格之才速成之學生則取更事較多立志猛進者取其聽從速化之效此目前姑請緩立大學堂專門先辦豫備速成二科之實在情形也至將來奏定京師大學堂章程擬卽全照大學規模恭擬上聞以備異日學成升入正科之用仍將現在所辦高等學校之豫備科並附設之速成科章程暨頒發各直省高等學堂小學各章程一併奏進候旨遵行再專門正科開辦雖尙可少稽歲時而考求不能不預爲地步擬俟照現擬章程先行開辦後再由臣慎選通達純正之員派赴歐美日本攷察其現行章程應屬書籍又請求化學醫學其房屋皆有一定造法以及光學家之暗室醫學家之暖房凡欲深究專門皆須先造特室其圖式皆宜豫向各國考求再中國學堂所請西人教習尙皆就近延請其本居中國者或爲傳教來華之神甫或爲海關退出之廢員在教者本非專門而學者亦難資

深造且西國學問數年一變則其人才亦月異而歲不同將來延請教習專門亦非在彼國文部及高等學堂攷問不能分其優劣似派員考察一層爲必不可少之舉現在湖北開已派人先赴日本卽用此意屆時擬由臣選得其人再行奏請辦理一講舍宜添建也查現在大學堂從前原係暫撥應用原議本須另撥地面俾可建合格之屋又須令四面皆有空地以便陸續增造工醫等項專門學堂今請仍照此議將來另須撥地新造方足以便推廣而壯規模惟目前一切尙待推求一面趕爲開辦只好仍就舊基修葺並將附近地方增拓辦理臣親往勘視丈量學堂四面圍牆計南北不過六十丈東西不過四十丈中間所有房屋僅敷講堂及教習官役人等之用其西北兩邊講舍共計不足百間非大加開拓萬萬不敷居住現勘得學堂東西南三面皆可拓開數十丈其地面所有房屋多係破舊民房若公平估價購買入官所費當不甚鉅此項新拓地面卽作爲增建學舍之用查大學堂開辦約有二年學生從未足額一切因陋就簡外人往觀者至輕之等於蒙養學堂此於上國聲名極有關繫朝廷興學育才方以振起全局爲要歸臣誠不敢希圖省事至使中國未收變通之效而先貽外人以口實之譏況一經開辦學生足額之後若再加以同文館學生以及官員司役人等總在千人以上斷非此方數十丈之地所能容納查外省如廣東之廣雅書院湖北之自強學堂兩湖書院上海之南洋公學視大學堂現在基址皆大至數

倍或一倍不止斷無京師制度反減於外省之理若過於狹隘不特無以示天下亦且無以示國中是增
講舍實爲學堂首先應辦之事不能不據實上陳者也一譯局宜附設也查現隸大學堂之官書局開辦
最早當時即選譯各局書籍及外洋各種報章上海設立南洋公學江甯新設學堂亦先後奏設譯書局
是擇書一事實與學堂相輔而行擬即就官書局之地開辦譯局一所蓋欲求中國經史政治諸學非藏
書樓不足以供探討之資欲知西國政治工商等情非譯書局不足以廣見聞之用也惟欲隨時採買西
書刷印譯本更宜設分局於上海則風氣既易流通辦理亦較妥便又編譯東文費省而效速上海就近
招集譯才所費不多而成功甚易南中紙張工匠比京師尤賤擬即將東文一項在上海隨譯隨印可省
經費之半惟是中國譯書近三十年如外洋地理名物之類往往不能悉爲一定之音書作一定之字擬
由京師譯局定一凡例列爲定表頒行各省以後無論何處譯出之書即用表中所定名稱以歸劃一免
淆耳目然譯局非徒編譯一切書籍又須編譯一切課本泰西各國學校無論蒙學普通專門學皆有國
家編定之本按時卒業皆有定章今學堂既須攷究西政西藝自應編譯此類課本以爲肄習西學之需
惟其中有與中國風氣不同及牽涉宗教之處亦應增刪潤色損益得中方爲盡善至中國四書五經爲
人人必讀之書自應分別計月垂爲定課此外百家之書浩如煙海亦宜編爲簡要課本按時計日分授

諸生蓋編年紀傳諸子百家之籍固當以兼收並蓄使學子隨意研求然欲令教者少有依據學者稍仿
津涯則必須有此循序漸進由淺入深之等級故學堂又須編輯課本以教生徒亦不得已之舉也臣維
國家所以變法求才端在一道德而同風俗誠恐人自爲學家自爲教不特無以收風氣開通之效且
轉以生學術凌雜之虞應請由臣慎選學問淹通心術純正之才從事編輯假以歲月俾得成書書成之
後請發各省府州縣學堂應用使學者因途徑而可登堂奧於詳備而先得條流事半功倍莫切於此一
書籍儀器宜廣購也查大學堂先被土匪後住洋兵房屋既殘燬不堪而堂中所儲書籍儀器亦同歸無
有臣愚以爲大學功課不外政藝兩途政以博考而乃精藝以實驗而獲益書籍儀器兩項在學堂正如
農夫之粟商賈之錢多多益善不特前所有者固當買補卽前所無者亦宜添購方足以考實學而得真
才查近來東南各省如江南蘇州杭州湖北揚州廣東江西南湖等處官書局陸續刊刻應用書籍甚多
請准由臣咨行各省將各種調取十餘部或數部不等此外民間舊本時務新書並已譯未譯西書均由
臣擇定名目隨時購取歸入藏書樓分別查考編譯至儀器一項除算學家所用以測量圖學家所用以
繪畫外如水火氣聲光電化以及醫學農學專門應用甚多不特每門皆有器具全副卽隨時試驗材料
藥水等項學生愈多則購用愈繁學問愈精則考驗愈數此類尤不可省儉之武備而靳予鎗礮子藥而

責以準頭命中必不能矣現擬先向上海日本等處購辦萬餘金以爲開辦普通要需再籌定經費向歐美各國廣購歸入各專門應用維採買必須得人價目務從核實俟臨時由臣採訪通達誠樸之員遣往辦理以期器歸實用款不虛糜一經費宜寬籌也學堂之設其造就人材爲最重其需用款項亦最繁從前大學堂教習功課僅分語言文字數科略教公法格致數事教習既無多人學生亦未足額計每歲所費已在十萬金上下今議規模既須宏備則款項何止倍增加以現在情形一切講舍書籍儀器各項或半歸殘破或掃地無遺計修理舊屋增造新齋購買各項政學應用書籍與圖藝學備驗器具材料等件又增添繙譯西書編輯課本等局費亦已不貲將來推廣博物院考工場以及派員考察之費學生游歷之費亦動巨款查戶部向有存放華俄銀行庫平銀五百萬兩每年四釐生息應得庫平銀二十萬兩甲合京平二十一萬二千兩光緒二十四年經戶部奏准以此項恩銀由該行按年提出京平銀二十萬零六百三十兩撥作大學堂常年用款係除一萬一千三百七十兩未撥今請將此項存款銀兩全數撥歸大學堂仍存放華俄銀行生息款項既有專注名目亦免涉紛歧將來或支或存由學堂自與銀行結算每年年終開單呈覽免其造冊報銷似此較爲直截至去歲學堂停辦尙有未經付出存款當時一律交回華俄銀行暨中國銀行暫行收管並經知照戶部在案現在學堂事同創始需用一切開辦經費

甚多應請將前項存款仍發回學堂應用惟似此辦法常年款所增尾數究屬無幾仍須添撥鉅款方足以資挹注查近年各直省如江南四川湖北湖南等處督撫皆資助學生出洋每次亦費至數萬金今大學堂既定高等功課專門教習則前項學生赴外肄業可送外國者亦可送大學堂且大學堂專門正科本爲各省高等學校卒業學生資送肄業地步則各省理宜合籌經費撥濟京師應請飭下各直省督撫大省每年解款二萬金中省一萬金小省五千金常年撥解京師大學堂有此增添常年款庶幾得以展布一切而諸事自日起而有功人才亦積久而漸出矣以上五款以豫定辦法一條爲總立大綱以購買書籍儀器附設譯局二條爲請求實用以增建學舍一條爲全拓規模而尤以寬籌經費一條爲諸事根本原均乞恩准施行俾臣得以從容布置至各直省合籌經費一節仍懇明降諭旨飭令各省督撫務需的款按季撥解大學堂應用出自逾格鴻慈上諭張百熙奏籌辦學堂大概情形一摺據因所擬章程大致尙屬周妥著即認真舉辦切實奉行朝廷於此事垂意至殷原冀興學儲才以備國家任使務各殫精竭慮爭自濯磨總之學術純疵爲人才消長之機亦卽風俗汚隆所係一切條規將來卽以通行各省必當斟酌盡善損益得中期於一道同風有實效而無流弊張百熙責無旁貸仍著悉心籌畫逐漸擴充次第興辦以副委任所備經費著各省督撫量力認解其有未盡事宜應卽隨時具奏○諭軍機

大臣等張百熙奏派大學堂總教習一摺前直隸冀州直隸州知州吳汝綸著賞加五品卿銜充大學堂
總教習○戊辰諭軍機大臣等色楞額奏朔陽縣屬民教不和聚眾相抗請派兵分別解散剿辦一摺直
隸朔陽縣屬革生鄧葉峯藉口教堂欺凌平民輒敢聚眾圍困搗毀教民房屋滋事屢次派委營縣前往
解散該革生不服開導勢釀愈張若不懾以兵威勢恐釀成巨變總兵楊玉書所統數營誠恐不敷剿辦
等語著袁世凱察酌情形迅速添派數營前往解散若從嚴拿首要務令民教相安以弭後患仍不得因
莽從事原摺著鈔給閱看將此諭令知之○諭此次祇謁東陵除軍機大臣照例扈從外其餘各衙
門著派吏部尚書張百熙禮部尚書世續兵部尚書徐會澧刑部右侍郎景灝工部右侍郎繼祿都察院
左都御史陸潤庠內閣學士崇壽文海太常寺卿印啟隨扈其餘各衙門均毋庸奏請簡派至內務府各
司處人員亦著從簡撥派以歸省約○李興銳奏江西防營遵旨裁挑改為常備續備等軍分別教練
酌擬軍制繕列清單恭呈御覽得旨著即安定操章督飭認真訓練隨時考察務收實效單併發○
信恪奏遵旨改練新軍建設學堂酌擬辦法情形得旨著照所擬辦理務當認真訓練隨時考察期
收實效○己巳李興銳奏江西省無業游民日見其眾此輩皆逸居無教專以游蕩為事尤甚者流而為匪
無所不至近日議設巡警軍必須清查街道斷難容其游行市面以致擾害閭閻泰西各國設有教工教

正等院收養無業游民教以工藝其法甚善周禮民無常業者罰之蓋所以儆游惰而塞盜源亦正此意
臣與新任藩司兼署臬司柯達時再四籌維擬於省城設立工藝院一所收儲游蕩及曾犯輕罰者俟派
工師教以工藝立三廠一曰粗工廠一曰細工廠一曰學工廠有衆人習藝之地有每人食息起居之
舍粗工如蒲鞋麥扇草帽麻繩諸事教過賤粗工之徒細工則糊書刻字織帶縫衣製履結綑之屬凡資
地稍好者使入而習之學工廠則凡良家之不肯子弟交兒師友所不能約束者聽其送院教以淺近書
算及精緻工藝禁錮不令外出以收其放心以儆其惰行並購致各種人力小機器分別教之各有課程
所習工藝製成發售除酌量提還料本外仍酌給本人隨時察看已知悔過自新即行資遣出院自謀生
業凡院中早作晚息飯食醫藥以至避暑給扇禦寒頒衣均定有章程專派委員數人管理此事現已先
籌集銀五千餘兩購地建廠即日開辦此外一切長年經費均由山外籌款支銷惟草創之初苦於財用匱
竭院落不能闊大約計以能容二三百人為率俟學成者遣出又別行收補一面通飭各州縣就地籌款
各設一院次第興舉久之通省無業游民均有託業之所自可永息盜賊之患得旨收養游民教以工
藝最爲良法美意著即認真辦理○庚午時享 太廟 上親詣行禮○辛未祭 社 稷壇 上親詣
行禮○命御前行走科爾沁扎薩克多羅賓圖郡王敏聰普扎布長子頭等台吉棍楚克蘇隆在乾清門

行走○壬申諭軍機大臣等所有續修大清會典全部共三百四十二函著內閣交外務部照原本石印進呈○諭李興銳奏查明上年江西被災各屬懇恩分別蠲緩新舊錢漕等項開單呈覽一摺江西南昌等府所屬各屬州縣上年五六月間被水被旱被風雖情形輕重不同收成均甚歉薄若將應徵新舊錢漕等項照常徵收民力實有未逮加恩著照所請所有勘實被災之義寧等屬州縣並九江府同知所轄之南九二衛及安義毗連之建昌又勘未成災民困未蘇之豐城等屬州縣均著將應徵新舊錢漕蘆課分別蠲免緩徵遞緩以紓民力○癸酉諭軍機大臣等徐德奏馳赴哲里木會辦事件隨帶司員一摺著卽迅速前往會同增祺調齊此案卷宗人證秉公訊辦詳細查明據實具奏另片奏請飭戶部行文奉省撥給薪水並乘坐火車前往各等語均著照所請行將此旨諭令知之○四川提督宋慶卒予祭葬建祠賜卹如尚書例晉封三等男戰功事蹟交國史館立傳賞其子試用道宋天傑以五品京堂候補○戶部左侍郎楊儒卒予祭葬○以程允和爲四川提督郭殿邦爲四川松潘鎮總兵○寶熙奏振興庶務必藉人才而培養人才必由學校伏讀本年十二月二十三日 上諭令宗人府八旗都統選擇各旗子弟出洋游學此誠開通風氣之至計培植人才之要圖也迴環跪誦感悚莫名然奴才至愚則猶有慮何也宗學久經廢弛八旗官學夙鮮變通必中學已明胸有主見然後學西學乃不至見異思遷學成來歸庶有

裨於我之政治今學校未興恐膺是選者一時尙難多觀則改設各項學堂似尤爲根本之急務也伏查
左右翼宗學及覺羅學共設十處常年經費不爲不豐如總副管等既罕通才難期振作虛糜侵蝕流弊
滋多遂至教習向不到學學生恆不至館每月數課不過虛應故事至期滿時類皆捏報成就學生幾名
而已至八旗官學八處每年經費由戶部撥領三萬餘金近年造就科舉之才亦頗稱盛然詢以內政外
交中西根柢之學則瞠乎若後其誤於從前之帖括咕嗶者亦無怪其然當此時事艱難人才消乏之際
非掃除積弊變通辦法不爲功擬請援照同文館歸併大學堂之例將宗室覺羅八旗官學改併爲小學
堂八處中學堂兩處庶規模整齊易於經理其宗學覺羅學原設之總管教習宜一律裁撤有在學年久
者或可酌給升途改併以後凡學堂總辦提調教習一切人員均歸管學大臣就素所深知者自行延聘
保送學生則小學卒業入中學中學卒業即可舉入大學堂至各學生考取後住址與某學相近者卽入
某學肄業八旗學生報考亦可由本旗徑報學堂無須由國子監送考以歸簡易其咸安宮官學景山官
學兩處亦請歸併辦理俾免兩歧惟第一則不能成任不專則固有終學堂改設創始頗難繼司得人
收效乃速京師大學堂前蒙 特派吏部尙書張百熙管理將來中小學堂課程亦歸該管學大臣所編
定是宗室八旗學堂與大學堂有恩惠相通之故且各官學既請改爲中小學堂十所經費豈有不敷大

學堂存款較多若以一手經營亦可藉資挹注可否卽行 簡派張百熙兼管宗室覺羅八旗中小學以一事權而專責成之處伏候 聖明裁奪近日屢奉 詔旨飭辦學堂若宗室八旗學堂能認真講求人才何患其不出矧又令其出洋游學則於西國政藝必更能博觀精取有所折衷根本至計興學宜先講明柔強全係乎此又奏查各省駐防亦有設立八旗官學及書院者類皆延聘蒙師數人山長一人虛糜經費有名無實擬請 嚴飭各省駐防將軍副都統延訪品學優長通達事務者不拘滿漢人員派爲總辦提調將本營所有之官學及書院仿照府縣各書院一律改爲小學堂將來小學堂卒業後卽送本省中學堂由此遞升並許其出洋游學游歷則有志之士爭先濯磨學以愈勉不致如從前之固陋矣又奏近日各省所辦學堂其總辦提調教習等員聞竟有不學無識濫用其間者學員一不得人人何由成就至府州縣改設之中小學堂多有將西文西語添入一兩齣而中學反未遑識及夫西文西語乃中學堂專門之一科小學堂斷無廢入之理倘不先講中學徒斤斤於此上者不過造就出一舌人之才下者則僅堪充一買辦之事會何補於我之政學乎相應請 旨通飭各督撫務當慎選學員力除瞻徇預防流弊核實奉行若仍如是苟且敷衍漠不關心深恐數年後成效無聞則學堂將爲集矢之地矣 上諭翰林院侍讀寶熙奏請變通宗室八旗學校章程一摺據稱宗學及覺羅等學教習學生恆不到館虛應

故事八旗官學於中西根柢之學亦少講求著照所請將宗室覺羅八旗等官學改設小學堂中學堂均歸入大學堂辦理庶幾掃除積弊造就通才著張百熙妥為經理以專責成而收實效另片奏請通飭各省駐防官學書院一律改為小學堂並慎選學員預防流弊各等語並著張百熙核議具奏○甲戌上御乾清宮與國使臣齊弼美國使臣康格德國使臣穆默英國使臣薩道義俄國使臣雷薩爾日本國使臣內田康哉大西洋國使臣白朗穀義國署使臣羅福納日國署使臣費思理和國署使臣羅拔比國署使臣賈爾牒法國護理使臣賈斯那覲見賀年○調陳邦瑞為戶部左侍郎戴鴻慈為戶部右侍郎轉沈家本為刑部左侍郎調梁仲衡為刑部右侍郎以盛宣懷為工部右侍郎○乙亥上詣奉先殿壽皇殿行禮○以黃建筦為湖南按察使○以郭曾忻署工部左侍郎○丁丑上御乾清宮總稅務司赫德主教樊國樑林懋德覲見○諭現在會議商約事宜著派呂海寰會同盛宣懷悉心籌議隨時具奏○諭中國地大物博礦產無窮寶天地自然之利十餘年來屢經降旨通飭開採而各省舉辦迄無成效亟應切實講求著即派張翼總辦路礦事宜仍著王文韶張鴻璣督同辦理所有親歷查勘並籌款擇人及應如何招商集股之處著即責成張翼認真經理妥議章程隨時具奏務當悉心籌辦以圖利源不准敷衍因循空言塞責○以保護教堂出力予直隸按察使楊士驥等優敘有差○袁世凱奏臣於上年十二

月間業將直境應募練新軍情形並擬在順直賑捐結存項下撥款一百萬兩暫作新軍餉需等情附片具奏恭奉 硃批著照所請該部知道欽此在案自應欽遵據派得力員弁迅速分投選募而招募之始又必先須妥訂章程查從前湘淮各軍創募之初其選擇亦係極慎重所有格式保結等類非不條理精詳厥後日久弊生乃漫失其本意近來武備愈弛疲弱尤柔比比皆是固由於訓練之無法實始於選募之不精大率就地取材濫竽充數非市井游惰卽革勇逃卒混跡其中操防稍嚴輒不耐勤劬遽屬潛逃而爲之官長者復漫罵不加顧情或缺額不補或隨時募充若視兵丁之去留有無無關輕重也者往往成軍數年而經練之熟手十無二三無異新集之師幾類烏合之衆一旦有警倉猝出征兵刃未交望風先靡猷駭鳥散不可收拾又其甚者失伍而後恃衆結夥挾械持鎗到處擾民乘便滋事剽掠焚殺無所不爲恣意橫行莫敢阻詰近年用兵各役覆轍相屬歷歷可徵 國家歲糜鉅餉乃不種一兵一卒之用轉使閭閻受逃兵潰卒之害誠私心痛之無他由選與練之皆失其方而未嘗立法以預防其弊也考古昔盛時兵民合一聚則爲兵散則爲民不待徵發而師徒之數按册可稽故無游民亦無冗卒方今泰西各國兵制猶爲近古又其風氣右武雖以王公子弟之貴亦必身入行間而問左齊民一隸軍籍卽克與貴族子弟編伍同列故人人以當兵爲榮而兵亦皆人人自重現值中國貧弱之際縱不能追蹤陸古

抗衡泰西亦宜略師其意參用其法以力挽晚近軍營積弊矣可逐漸整頓化冗弱而爲精強臣受恩至深任寄至重軍符忝揮責有攸歸謹就籌畫所及釐訂募兵章程十九條遵委臣部武衛右軍營務處候選道王英楷王士珍等分赴正定大名廣平順德趙州深州冀州各屬會同各該地方官按屬均派精壯丁六千人卽令該道等分領訓練兵必合格人必士著應募之後按名註冊交地方官分存備案以便稽考並分餉以贖其家屬計畝以免其徭役顯示體恤之心隱寓防維之意其有入伍審試私自逃脫者則責成地方官分行查緝倘承緝不力卽按軍政緝拿逃兵則例分別參處庶兵少逃亡技皆嫺熟不至虛耗訓練之日力空虛 國家之餉精實於經武整軍不無裨益俟試行有效再當漸次推廣總期日新月異仰副 聖主振興戎備力圖自強至意得 有著照所請該部知道單併發○戊寅諭政務處會同吏部兵部奏遵議河東河道總督錫良陳河工變通事宜一摺欽河改道以來直隸山東兩省修守工程久歸督撫管理錫良原奏所稱漕米改折運河無事河臣僅司堤岸撫臣足可兼顧等語該河督身親目擊自屬確實可憑所有河東河道總督一缺著卽裁撤一切事宜改歸河南巡撫兼辦其酌擬宜裁宜留及分別緩急各節均著照所請行仍責成錫良將裁併各事宜一手經理俟諸事辦有頭緒再行奏明請旨其裁汰各員弁及應裁兵丁著吏兵二部隨時查核辦理至運河道現既裁撤該河督請將登沂

曹濟道移駐濟甯兼辦運河事務並河懷城守營運河道屬運河營兩營弁兵應否裁留及此後運河修
洛事宜著山東巡撫酌度地方情形詳議具奏○諭爲政之要首在得人內而部院外面封疆均應以詢
事考實爲鑒別人才之準各部院衙門行走人員旅進旅退何能明習例章諳練政事現當振興庶務亟
應切實考課以期鼓勵眞才著各堂官於該衙門司員除掌印主稿各員每日自有應辦事件應隨時考
核外其餘各員不分滿漢及筆帖式均令檢閱例案俾得專心考究遇有應辦應議奏各事件卽令學習
擬稿並准其各抒所見另具說帖呈堂察閱以備採擇一切要差卽由此選派務使司員皆能親身治事
得近等自無從敷衍蔽掩極至各省候補人員冗濫尤甚平時不加考察一旦使之臨民蒞事安望其措理
得宜近來各省已有奏設課吏館者自應一體通行惟重在考察人才不得視為調劑閒員之舉仍著該
將軍督撫兩司等勸見僚屬訪問公事以覘其才識並察其品行其賢者量加委任不必盡拘資格其不
堪造就者卽據實參劾咨回原籍統限半年具奏一次務當破除情面嚴行甄別不准虛應故事稍涉瞻
徇致負朝廷循名責實之至意將此通諭知之○諭各省直省衛所屯田原爲轉漕養贍運丁而設自南漕
改由海運以來屯衛弁丁半成虛設此項田畝私行典賣轉轉轉轉弊端百出現又定章改折漕糧急宜
認真清查改歸丁糧以昭覈實而裕賦課著漕運總督陳夔龍會同有屯衛省分各督撫將各省屯田地

欽逐一澈底查明悉令該屯戶報官稅契聽其營業將屯餉改爲丁糧統歸州縣官經徵如有盜賣私售者亦飭據實報明完納正供不究既往更須嚴禁胥役需索苛擾此後屯丁運軍名目概行刪除其原設之衛守備衛千總等官並著裁撤改歸營用卽由各省督撫於各標內仍以原班酌補所有詳細章程著陳壽龍等悉心會商妥議隨時奏明辦理○諭軍機大臣等政務處奏遵議山西巡撫岑春煊奏請振興農工商業以保利權一摺農工商業爲富強之根本自應及時振興除商務已特派大臣專辦外其農工各務卽著責成各該督撫等認真興辦查照劉坤一張之洞原奏所陳各就地方情形詳籌辦理並先行分設農務工藝學堂以資講習將此各諭令知之○以蔣寶華兼署工部尙書○辛巳袁世凱奏熱河朝陽縣革生鄧榮峯聚衆仇殺抗官請將歷次籌辦並派員查防商添兵隊情形據實陳奏得旨著嚴飭所派兵隊相機妥辦毋許孟浪仍將查探情形隨時據實具奏○壬午雪○乙酉諭錫良著調補河南巡撫兼管河工事務卽將前次奏請裁撤東河總督一切事宜妥籌辦理○丙戌督辦四川礦務大臣李徵庸奉旨祭葬○戊子諭詹事府係沿前明官制名實本不相符應卽併翰林院昨已將吏部請簡漢庶子兩缺摺件留中嗣後出有該衙門滿漢各缺均著扣除無庸奏請簡補至通政司專管題本現在改題爲奏其官缺著卽一併裁撤應裁各官缺出卽照詹事府辦理該衙門官署著留爲改建翰林院之用

所有未盡事宜著各該衙門妥議具奏○岑春煊奏晉邊歸化城同知通判各缺經升任撫臣張之洞以地方緊要事務殷繁今舊情形不同奉准改為撫民同知通判滿漢兼用並更定缺分按邊俸期滿照例給咨赴部引見後回任候升各在案茲查歸化城同知通判自前此變通後曾有起色無如近來時勢變遷治理之難需才之亟有非將寶缺人員優予升途不足以示鼓勵者故察核情形約有數端邊外原來歸化薩拉齊托克托城和林格爾清水河五廳僅管土默特數百里之地豐寧二廳僅管原設豐川寧朔各衛所及察哈爾右翼已墾二百數十里之地近則界地日廣不獨右翼各旗私墾各地寄居漢民詞訟皆來赴豐寧各廳呈控即伊烏兩盟境內商民控案亦以歸薩二廳為隨歸達者有千數百里近者亦四五日里蒙漢錯處良莠不齊散勇游匪於焉叢集土蒙地棍爭相雄長命盜各案相驗緝捕均有鞭長莫及之感現在察界正辦押荒西盟釐興墾務艱鉅之集十倍於茲尤非長才難資整理此宜變通者一也邊地在咸豐以前民風樸厚土客無猜既無交涉之端且為外人蹤跡所不至是以中材皆能勉盡職守近自傳教之約逐漸推行教民之多教案之重甲於通省往往爭財爭地動輒爭鬪上年拳教之變口外最慘慘諸其本亦在於此刻下調輯民教籌辦交涉倘有不慎輒生波折而邊外各缺向稱極苦有不數開文者有尚須賠墊者有患賄通牽掛之累而未敢久居不肯者存微倖掩覆之懷而惟圖苟免則何以修

內政何以篇外交此宜變通者又一也查定例吉林賓州等廳撫民同知長春廳撫民通判各缺均俟一年俸滿著有成效令該將軍等詳細查看出具切實考語具題到部入於卽升班內升用仍在任候升等語今督省邊疆各缺治理之難地方之要與吉林情形相同應援案均俟三年俸滿詳加查看出具切實考語具奏到部入於卽升班內升用仍在任候升等情由署布政使吳廷斌歸綏道恩銘會詳請奏前來臣覆查歷來振興吏治必以鼓勵人才爲急務今邊疆事務之繁如此缺分之累如此若不設法變通優予獎勵其何以輯和民俗綏靖邊隅合無仰懇 天恩俯將督省歸綏道歸化薩拉齊豐鎮等撫民同知三缺托克托城和林格爾清水河寧遠等撫民通判四缺均照吉林章程作爲三年俸滿查看出考奏請入於卽升班內升用仍回任候升以勵人材而飭邊治之處出自 逾格鴻施下吏部議奏○辛卯諭國家深仁厚澤養育八旗兵丁給予錢糧贍其身家近來庫款支絀異常猶復減成給放體恤固已至周乃聞支放錢糧多佐等官之不肖者往往通同弊混竊竊領催尤爲奸竊遂層剝扣兵丁所得無幾甚至冒領孤寡錢糧出缺多年不報種種虛偽殊屬不成事體著派善書溥良載澤載京載瀛桂春敬昌祥贊澈底清查將各旗兵丁戶口核實造冊釐剔各項弊端奏明辦理該王大臣等務當破除情面認真整頓各宜激發天良毋稍欺飾干戾○諭軍機大臣等理藩院奏台吉呈控盟長通匪據情代奏一摺所控扎

薩克圖郡王烏泰斂財虐衆不恤旗報通匪搶掠致將扎薩克印信不知去向前後所報兩歧情節支離
亟應澈底根究著裕德會同增祺確切查明據實具奏原呈著鈔給閱看將此各諭令知之○許祐身奏
交涉事件教案居多近年尤爲辦理艱難教士之租庇教民官吏之曲徇教士已成習慣民教仇怨因由
是生不知彼國行教本不許干預地方公事特以中西律法不同而又一味恃強不能服我官司格違禁
令其來華公使領事等官之於教民但有保護之責而無轄制之權往往心存見好爲之袒袒如每遇
教案公使等反肆意要求亦可知洋員之不肯裁抑教士矣欲辦理教案之得手非派專員不可即派專
員平日以接洽教士講求交涉爲務設遇教案即可馳往該處協同地方官與教士妥商稟山督撫議結
則延玩推諉之弊可除擬請 飭下各督撫於實缺候補人員內擇其通曉時務品行端方者量教務之
繁簡每省奏派一二員駐紮往來衝要之處如能三年內不出教案或有教案即可持平速結由該督撫
據實奏保候 旨擢用則効力者羣思振奮且因教務而特派專員亦可謂曲盡保護之道 上諭御史
許祐身奏請飭令各督撫特派專員辦理教士一片外務部知道

光緒一百七十二

臣朱壽朋敬編

臣章圭璋恭校

二月壬辰朔諭朕於三月初六日啟發後著派慶王奕劻大學士崑岡協辦大學士徐郃吏部尙書步軍統領敬信四人分日輪班在內值宿不值宿者於申刻散值散信每日進內辦事後毋庸值宿午刻先行散值○諭昨日有旨派營書等清查八旗兵丁錢糧此等積弊內務府三旗亦復相同著世續繼祿文廉澈底清查認真釐剔核實造冊奏明辦理毋稍瞻徇○諭朕欽奉 慈禧端佑康頤昭豫莊誠壽恭欽獻崇熙皇太后懿旨此次祗謁 東陵前經降旨力從簡約並諭令御前大臣軍機大臣內務府大臣將各項事宜會議具奏茲據世鐸等酌核覆奏分別減撤各節著即照所議辦理至途中備辦一切均准作正開銷著袁世凱懷遵前旨不准絲毫擾累百姓宮門浮費一律禁革其隨扈官員並毋庸地方供應卽隨送酒食亦但裁免如有冒名需索藉端滋鬧等情無論何人准由地方官立時扭獲究辦不得事後推諉倘此時再難嚴宮廷常以愛惜物力爲心益敦節儉爾大小臣工皆當隨時省察力戒虛糜共副崇實去浮至意將此通諭知之○癸巳諭各省制兵積習太深亟宜更定餉章認真改練前經諭令各該將軍督

撫悉心核議具奏迄今數月奉到者尙屬寥寥當時局艱難豈容因循怠弛著各該將軍督撫等速將
兵制餉章切實釐定覆奏到日由政務處彙齊覆核定冊一章程請旨頒行遵守務期兵歸實用餉不
虛糜至武備學堂尤爲教練將才根本前已通飭各督撫設法籌建並令劉坤一張之洞袁世凱將一切
規制章程妥議具奏亦尙未據奏到著該督等迅速奏覆候旨定奪傳各省一律遵行勿再延緩有負委
任○諭前經通飭各省開辦學堂並因經費難籌復諭令仿照山東所擬章程先行舉辦迄今數月各該
省如何辦理多未奏覆卽間有奏到亦未能詳細切實該督撫等身膺重寄目擊時艱當知變法求才實
爲當今急務其各懷遵迭次諭旨安速籌畫實力奉行卽將開辦情形詳細具奏如再觀望遷延敷衍塞
責咎有攸歸不能爲該督撫等寬也○諭中國律例自漢唐以來代有增改我朝大清律例一書折衷至
當備極精詳惟是爲治之道尤貴因時制宜今昔情勢不同非參酌適中不能推行盡善況近來地利日
興商務日廣如礦律路律商律等類皆應妥議專條著各出使大臣查取各國通行律例咨送外務部並
據實成案世凱劉坤一張之洞慎選熟悉中西律例者保送數員來京聽候簡派開館編纂請旨審定頒
發總期切實平允中外通行用示通變宜民之至意○甲午諭軍機大臣等有人奏山東辦理稅契弊端
百出請飭查辦一摺據稱山東有漏稅者准人告發誣告不坐且提漏稅二成充賞丁胥訛詐貽害多端

等語差役藉端擾累實爲地方之害著張人駿認真查辦妥定章程務恤下情而杜弊端另片奏辦縣匪徒綁人勒贖隊長王桂蘭通匪分贓現已查拿到案近聞有人規避處分欲爲開脫等語並著督憲究辦毋稍徇縱仍飭將餘盜緝拿懲治以靖閭閻原摺片均鈔給閱看將此諭令知之○諭軍機大臣等太常寺奏 歷代帝王廟應修各工並修補祭器等語著承修大臣世續等一併估修○諭御史蔣式理奏請旨飭查以崇儉德一摺據稱內務府查照戶部會補納光緒二十六七年交進之銀共二十餘萬兩以備宮中之用現在庶務紛繁無一不須經費力求撙節宜始自聖躬等語 聖訓皇太后躬行節儉宮廷服御一切無在不力從省約至各省水旱偏災立頒賑濟或隨時恤兵丁優予賞給亦皆出自內帑朕以天下養三節進奉各欸每年不過十餘萬兩而 宮廷費用及添製各項一併在內 聖懷儉德實爲前史所無稍有人心者當無不同聲欽服乃該御史冒昧陳奏實屬昏謬糊塗試問臣庶之家因節省日用薄於奉養天理人心其何以安該御史所奏將朕於何地本應嚴加議處仰承 慈訓曲予寬免用特明白宣示當爲天下臣民所共諒也○諭前據丁振鐸電奏廣西邊界散勇游匪勾合搶劫現正派隊防剿等語迭經嚴諭迅速剿辦一面將各國教堂教士等切實保護並飭蘇元春馳回廣西接統邊防各營責成將一切防剿事宜妥爲經理茲據丁振鐸電稱達隆二疊洋官二人由布局對汛前往越地被匪

鎗斃等語游匪滋擾致洋官無辜被害殊深惋惜該地方汛防不力實堪痛恨著丁振鐸查明分別文武各官職名卽行革職並著陶模丁振鐸蘇元春將此次匪徒認真剿辦迅速撲滅並通飭各屬加意保護洋人及各處教堂教士人等以靖邊疆而弭後患倘有貽誤惟該督撫等是問懍之○諭本年輪應查閱山東河南江蘇安徽江西五省營伍之項山東卽派張人駿河南卽派錫良江蘇卽派恩麟安徽卽派聶緝槩江西卽派李興銳將各省制兵防營逐一查閱制兵積習尤深昨已有旨飭令各省督撫將兵制餉章速爲釐定現當整頓軍制尤應認真訓練儻有技藝生疏空名缺額老弱充數及軍實不齊等事卽將該管將弁從嚴參辦毋得稍涉瞻徇用副朝廷整軍經武實事求是之至意○乙未諭朕欽奉 慈禧端佑康頤昭豫莊誠壽恭欽獻崇熙皇太后懿旨據外務部奏稱本月初一日義國署公使谷屬行經北御河橋突有匪人將帶綫鉛石從遠處擲擊幸未受傷等語各國駐京人員及其眷屬朝廷一視同仁以禮相待凡我民人豈容稍涉侮慢屢經通飭曉諭不啻三令五申乃尙有頑劣之徒不知輕重致公使眷屬無故受驚實屬不成事體著步軍統領衙門嚴飭查拏務獲究辦嗣後當一體遵照保護不許欺陵如再有違犯情事著卽將該地段官弁查參議處並將滋事之犯照例懲辦如係兒童無知仍當罪坐家長以儆洩風而防後患將此通諭知之○內中譚軍機大臣等奎俊奏請派員會辦川省礦務商務等語四川

存記道沈綱濟著賞加四品卿銜充會辦四川礦務商務大臣准其專摺奏事仍著奎俊督同辦理務當認真經畫以保利權將此諭令知之○諭昨據丁振鐸電奏洋官由布局對汛前往越地被匪鎗斃等語當經降旨嚴飭將分防文武各官查參將此項匪徒認真剿辦茲據丁振鐸續電奏稱查明法兵官被害一案據管理布局對汛鎮南營管帶趙從楷稟稱正月十八日法國駐守那爛之二營適遇達隆二營及稔浪二營同到那爛偕來布局營中聚會轉回是夜三更後據那爛稔浪洋官來營說及達隆二營隨帶越兵一人行至越南龍村地方被匪鎗斃託幫同緝兇究辦並無異言現據領事照會請為防緝查法兵官係在越地被害現已派弁會緝各等語法國兵官雖係在越南境內被害惟與廣西邊界毗連仍應不分畛域查拏兇犯以屬邦交著丁振鐸蘇元春嚴飭邊防各營趕緊遵照辦理毋許鬆懈○戊戌諭軍機大臣等理藩院奏科爾沁扎薩克鎮國公喇什墩珠爾等呈報扎薩克圖王旗圖古木地方賊匪聚眾肆行搶奪及派兵剿辦情形將原呈譯漢呈覽一摺卓索圖土默特貝勒旗亂匪滋事致斃奴員多命自應迅速查辦著裕祿會同增祺確切查明歸入前案認真辦理據實覆奏原摺呈均著鈔給閱看將此旨諭八旗知之○諭張翼奏遞陳下情一摺據稱鐵路礦務兩事責任繁重自揣望淺資輕請加派大員等語路礦為興利要圖張翼既經簡派自應殫精竭慮任勞任怨力圖報稱前已特派王文韶張鴻鵬督辦所

有一切事宜該侍郎自可隨時會商王文韶鴻璣酌核辦理應卽悉心規畫認真籌辦以副委任所請
添派大員專司其事之處著毋庸議○己亥諭袁世凱奏懇請回籍終制營葬一摺覽奏情詞懇摯具見
孝思惟值此時局多艱直隸地方緊要辦理交涉及善後一切事宜正賴該督悉心籌畫宏濟艱難所請
回籍營葬之處著俟秋間查看情形再行賞假該署督務當仰體朝廷倚畀之意移孝作忠力圖報稱用
副委任○外務部奏光緒二十七年十二月二十五日政務處具奏開辦礦務一摺奉 旨依議欽此遵
鈔知照前來臣等當卽按照原奏內所稱延聘礦師查勘礦山及豫購機器雇招商股各節詳加籌議復
於本年正月十六日欽奉 諭旨派張翼總辦路礦事宜王文韶鴻璣仍奉 命督同辦理自應仰體
朝廷振興之意悉心籌畫以濬利源臣等竊維中國礦產之富甲於五洲特以地質素昧講求開採未
能如法鳩資試辦成效茫然近來風氣漸開始知西國礦學之精更機器之利便然必有能識礦師之人
而後不爲下等礦師所惑有自製機器之廠而後不以廣購機器爲難際此庫款空虛經費難籌措自
不得不借資商力願爲招徠顧華商見小欲速勢散力微集腋成裘之鉅資收效在數年以後勢必遷延擱
望裹足不前而奸詐嗜利之徒又往往以一紙呈詞希圖攬辦斥之則有所藉口准之則益敢效尤甚且
勾結外人輾轉售賣其弊必至於利權盡失爲今之計惟有明定畫一章程使人人曉然於厚生利用但

能上下交益 國家固無所私無論華洋各商皆可照章承辦其有違背定章任意要索者仍應堅持駁阻杜絕弊混卽所以鼓舞商情也等語訪周諮公同商酌謹擬礦務章程十九條恭候 欽定如蒙 俞允卽由臣部通行飭遵其有未盡事宜應由礦務總局隨時體察情形奏明辦理得 旨允行○外務部奏臣部籌備出使經費係由各關所收六成洋稅項下酌提一成半存儲候撥每年約共收銀一百餘萬兩從前支款歲有常經出入尙足相抵近年以來各處分館日益繁多外洋使用金磅展轉匯兌每多折耗以致漸形支絀加以屢次 特簡專使出洋交際所關需款尤鉅上年臣部改章奏明堂司各官養廉如三成鈔不敷支給亦從使費內撥用而近日義奧兩國使臣又迭向臣部商請奏派使臣專駐彼國亦恐難於堅拒此外不時之需更難預計臣等通盤籌畫轉瞬已有竭蹶之虞惟際茲時艱孔亟亦未敢另行請款上煩 宸廑計惟有就原定歲收經費之數明定限制力求撙節庶可稍資補苴現經督飭司員就近徵集各國使臣報銷各册詳加酌覈凡有可以節省之款均一律切實裁減以愼度支謹擬章程四條繕摺恭呈 御覽如蒙 俞允應由臣部分別行知各出使大臣自接到部文之日起一律遵照章程辦理如此後報銷有與本局所定章程未符者卽由臣部隨時咨駁得 旨允行 出使章程 一出使隨員人數光緒十四年經臣衙門酌定使臣館中准設參贊二員編譯二三員隨員二三員供事二員武

升學生各一員其設有分館者添添參贊或領事一員編譯隨員供事各一員作為定額奏准通行在案
惟近年使臣隨帶人數仍間有逾於定額者擬請飭下出使各大臣嗣後統計奏調咨調隨員務必遵
照定章如有逾額卽由臣部奏咨核減其使署中有延用洋員者應令併入隨帶人數內核計至出使西
洋各大臣俸薪係按九成支給近因磅價日昂頗受折耗應自本年起重減減成以示體恤出使東洋各
大臣俸薪均照章八成支給參隨等員俸薪查近數年各使臣咨報銷冊內所開銀兩成數不一此後各
館隨使人數既少參贊以下俸薪亦宜量從優厚藉資鼓勵統由各該使臣隨時酌定咨報臣部查核
一使費內俸薪等項約略可以預計嗣後應明定歲支總數以示限制臣等公同商酌所有駐紮美日秘
使館及紐約等處領事署經費每年准支銀二十萬兩駐紮英義比使館及新嘉坡等處領事署經費每
年准支銀十二萬兩駐紮日本使館及橫濱等處領事署經費每年准支銀七萬兩駐紮俄法德三處使
館每處每年准支銀六萬兩駐紮韓國使館及漢城等處領事署經費每年准支銀五萬兩駐紮海參威
商務委員每年准支銀二萬兩以上歲支共需銀六十四萬兩有闕之年照章加支如由臣部派往肄業
學生薪水等項准其另款開支自行咨調學生不在此例一使臣及隨帶人員間有留支安家銀兩者
嗣後除報銷冊內仍照向章逐員聲敘外應令另造留支銀數一冊按年隨同銷冊咨部並將此次留支

銀兩各在使費歲支數內聲明扣抵以便稽核 一出使各館經費既經明定歲支數目嗣後如有不時之需事關重要雖爲章程所未及而實不得不作正開銷者應由各該使臣先行咨商臣部候酌定咨覆後再行撥用或有用數難以預計暨不及咨商之事亦准各該使臣一面支用一面咨報臣部查核統俟事竣另案核實造報○庚子前工部尙書錢應溥卒予祭葬賞其子檢討錢駿祥以應升之缺升用○辛丑追贈前直隸提督聶士成太子少保銜照提督陣亡例賜卹戰功事蹟及死事本家付國史館立傳立功省分死事地方及原籍建祠賞其子候補知府聶汝魁以道員卽補○癸卯調特圖慎爲禮部左侍郎榮惠爲盛京侍郎○甲辰諭軍機大臣等有人奏雲南學政田智枚赴任時行至湖北建陽驛地方該學政家人毆斃夫役激動衆憤相率阻行致向地方官借銀說和等語著張之洞端方按照所參各節確切查明據實具奏毋稍徇隱原片著鈔給閱看將此各諭令知之○丙午諭長庚奏領隊大臣籲懇陛見並因病請假據情代奏各摺片類輟特領隊大臣英裕既請陛見又稱觸發舊疾請給假調理等語寶麟任意瀆陳英裕著卽開缺○丁未諭朕欽奉 慈禧端佑康頤昭豫莊誠壽恭欽獻崇熙皇太后懿旨袁世凱奏查明故提督子嗣候旨施恩等語已故提督聶士成之母年逾八旬著賞銀一千兩由廣儲司給發伊子分省補用知府聶汝魁著以道員分省補用候選知府聶憲藩著以知府分省遇缺卽補以示錫類

推恩有加無已之至意○諭錫良電奏河南泌陽縣高店等處鄉民因挾教堂賠款之恨糾聚多人至楚
豫地方殺死教民葉姓一家四命又至程店殺害教民一名又將桐柏縣烏金溝教堂焚燬燒斃教民四
名殺死五命均無洋人已派隊彈壓嚴緝並將泌陽縣撤任查辦等語各省教堂教士及教民人等切延
一視同仁懺經嚴諭各該督撫通飭各屬切實保護並諭令隨時開導百姓務使民教相安此等誥誡不
啻三令五申當如何仰體國家德意實力遵行無稍疏失乃河南泌陽等屬竟有焚燬教堂並殺害教民
十四命重案似此冥頑滋事目無法紀實堪痛恨著錫良督飭該地方官迅速將各兇犯悉數緝拿務獲
訊明卽行就地正法泌陽縣知縣費鴻年著卽革職仍勒限緝犯內有桐柏縣地方該縣亦難辭咎著一
併查參該教民等被害多命憫惜殊深著該撫妥爲撫卹並將此案趕緊辦結毋稍延緩○調永隆爲正
白旗蒙古副都統以特圖慎爲正黃旗漢軍副都統○刑部右侍郎梁仲衡因病乞休允之○戊申諭軍
機大臣等薩保奏江省開復蒙王無案可稽請仍革任不准再管旗務一摺扎薩克圖郡王烏泰前經參
革並無開復之案情節種種支離著裕德會同增祺歸併前案認真查究務期水落石出據實具奏毋稍
徇隱原摺著鈔給閱看將此諭令知之○外務部奏上年三月間接據德奧義三國使臣照會內稱前因
駐京兵丁人數衆多有死亡者不能擇地埋葬當於二十六年秋間將崇文門內迤東靠城根空地一

塊勘定作為德奧義三國人民葬埋之所務希出示曉諭附近居民不許騷擾暨有損害情事並請立一碑碣用顯明字樣鐫刻妥為保護等語當經臣等派員前往查勘該處已有三國葬埋之墓所佔之處半係官地半係菜園均屬空曠之所確與民居無礙維時大亂市平和約未定勢難拒其所請且已葬之墓更難強令遷移惟有仰體 朝廷矜恤遠人之意照覆允准仍限定四至不使稍越範圍以免日久推廣其四至地基闢以圍牆並置立碑碣以誌起訖報聞○以胡燏棻為刑部右侍郎唐景崇署工部右侍郎○俞徐忻為伊犁領餉特領隊大臣○庚戌諭軍機大臣等昨據袁世凱具奏直隸協餉短絀情形當飭戶部妥為籌議茲據奏核定協餉款目除分別酌緩外應飭協撥各省共解每年三百十八萬不得再有短欠等語各該督撫務當兼顧統籌共維大局審自本年為始即照戶部核定單開各款籌解足數不准稍有短欠○壬子命恩惠善旌崇壽馳赴 東陵查看紅格○乙卯陳夔龍奏 臣恭閱電鈔光緒二十八年正月十七日欽奉 上諭各省衛所屯田原為轉漕養贍進丁而設自南漕改由海運以來屯衛升丁半成虛設此項田畝私行典賣輾轉糾紛弊端百出現在定章改折漕糧亟宜認真清查改歸丁糧以昭核實而裕賦課著清運總督陳夔龍會同有屯衛省分各督撫將各省屯田地畝逐一澈底查明悉令該屯田戶報官稅契驗其管業將屯田改為丁糧統歸州縣官經徵如有盜賣私售者亦飭據實報明完

納正供不究既往更須嚴禁胥役需索苛擾此後屯丁運軍名目概行刪除其原設之衛守備千總等官並著裁撤改歸營用卽由各省督撫於各標內仍以原班酌補所有詳細章程著陳夔龍等悉心會商妥議隨時奏明辦理欽此並准戶部兵部先後咨行前來伏查旗丁久不供差猶資屯田養贖仰蒙 皇太后 皇上如天之仁但令納稅完賦仍舊營業其盜賣私賣者不究既往該丁等具有天良無不同聲感激惟向來魚肉旗丁之胥差人等一旦絕其利藪難免有意遷延必須酌定簡明易行之法立限辦理庶不致扞格難通旗丁典賣屯田由來已久輾轉甚多若必按照原屯原丁稽核田畝不但竣事無期更恐多所掣累既蒙 聖恩不究舊實似可卽憑該衛現徵冊籍其田無論在丁在民均令現業之人納稅完賦則事既易行錢糧亦不致隱漏 前於恭閱電鈔時卽經悉心籌畫酌議大概辦法電致各省督撫臣會同商辦謹將所擬八條爲我 皇太后 皇上陳之一事宜速辦以防胥差人等抽匿冊籍造言煽惑之弊一交收定限各衛經徵屯餉皆有冊串擬限於奉文一月內將原冊原串移交州縣接管接徵其接管官擬限於兩月內查明具報不得藉端遷延一挨查戶口編審丁口既需時日亦恐滋擾衛籍考試詞訟等事本係州縣官管理無須再行移交戶口以免騷擾一擇用舊差州縣接管屯田開辦之始事體極其繁重擬准擇用衛所勦逆舊差以資熟手而免觀望一官給印照欽奉 上諭令屯戶報官稅契查

屯田典賣有契自業無契一概由藩司糧道會給印照以憑報稅管業稅宜從輕尤應嚴禁苛索一酌
定錢漕欵奉 上諭屯餉改爲丁糧擬按照田地等則酌定兩忙徵銀及漕米應徵之數其未定以前仍
暫照舊制徵收一定費需衛官交代州縣接收如能依限竣事擬請量予獎勵逾限有罰其督催官考成
視所屬爲斷一分別歸標所裁實缺衛官自應卽留原省惟候補人數甚多當此裁改兵制之際勢難悉
留漕標卽江南各標亦必不能盡用擬將候補衛所人員分發向有衛缺各省收標以免壅滯以上各條
臣係忖度事理酌擬辦法非敢謂盡屬可行況各省情形不同各衛繁簡亦異既將軍屯歸併州縣必須
因地制宜斟酌盡善定爲經久之規固不敢稍涉因循亦未可操切從事其間如有應行變通之處以及
一切未盡事宜非臣所能適度均由各省督撫臣督同司道妥議辦理臣仍盡心會商隨時奏請 聖訓
總期有裨賦稅無擾民以冀副 朝廷裕課恤民之至意得 旨仍隨時會商各該督撫妥籌辦理○
丁巳外務部奏光緒二十七年十二月二十五日前出使德和國大臣呂海寰奏和蘭屬地僑寓華民亟
宜設法保護添派領事一摺奉 硃批外務部議奏欽此欽遵由軍機處鈔交到部臣等查泰西各國於
南洋各島經營開埠以和蘭爲最先華民往彼謀生者歷年既久人數倍多洋官之徵取無藝地主之陵
虐百端亦以和蘭爲最甚前於光緒十三年兩廣總督張之洞派員訪查得知梗概迭經臣衙門與各出

使大臣籌商擬在噶羅巴等處設立領事和外都一意推阻遂難就議茲據該大臣奏稱迭接該處華商等稟報密察情形其種種苛待華民更甚於昔而宜設立領事以資保護屢與和外都反擬辦論已有端緒查和屬應設領事者七處如噶羅巴三寶瓏泗里重望加錫勿里洞日里文島均關緊要今惟噶羅巴設立總領事爲萬不可緩等語等復查南洋各島如英屬之新嘉坡美屬之小呂宋皆已設立總領事朝廷一視同仁必不忍和屬俯視獨抱向隅之憾惟該國以各島爲外府因我設立領事恐不免以猜忌之心仍作宕延之計必須援據公法查照成案再三與之中辯始可漸就範圍原奏所稱現在重訂商約正可及時聲明凡各國通商口岸及各島嶼華民華工萃集之處中國查看情形隨時均可商設領事請飭商約大臣會商外務部趁此訂約之時與和蘭增入中國可在噶羅巴島等處設立領事之條各節原以補從前條約所未備前據盛宣懷來電擬交英使各款已有英國允中國可派領事駐紮英國屬地一條英國如能商允和蘭亦易援辦呂海寶現經奉旨留滬會辦商約自可與盛宣懷隨時相機籌議其和外都既經議有端緒應即贊成接任出使大臣應與該外部申理前說切實磋商內外堅持力辦此事務期得當至所需經費應俟添設領事議定後再由臣部酌照章程奏明辦理得旨如所議行○戊午諭軍機大臣等有人奏廣東盜匪猖獗請飭嚴定捕盜章程等語廣東盜風素熾全在各州縣暨

水路管帶各員不分畛域認真緝捕著陶模德壽督飭文武各員實力整飭如有緝捕不力及推諉賄縱各情弊卽指名嚴參以儆玩愒至應如何廣定章程之處並著悉心妥籌辦理原片著鈔給閱看將此各諭令知之○裁撤直隸清運州同一缺州判一缺把總四缺經制外委四缺千總二缺○己未 上詣
泰先殿 壽皇殿行禮○庚申諭御史王乃徵奏京官放缺宜照定章等語奉天府府丞兼學政向例以四五品京堂及翰林院侍讀侍講等官升調前據軍機大臣開單請簡係照定例辦理並無不合至揚州府知府彭見紳被取單內並未簽註告假茲據軍機大臣面奏因未經吏部知照故未黏簽現今行查吏部等語著俟該部覆到卽行請旨○諭王乃徵奏請力除用人積弊一摺爽良黃璫係赴行在中途迎鑾特旨召見察其人尚可加恩開復原官王廉以革職在籍人員擅遞安摺不諳定例是以申飭何謂兩事相歧朝廷黜陟自有權衡該御史未經訪問明確何得率意陳奏至摺內所稱保舉太濫各節及另片奏請將報効給獎一律停止等語著該部一併議奏○諭軍機大臣等本日禮部奏已故大學士李鴻章建立專祠請旨遵行一摺著順天府建造典守○諭本年順天鄉試在河南省舉行著派陸寶忠前往監臨○是月義大利國新簡駐華使臣囑登納抵任

三月辛酉朔諭國家懷保羣黎惟恐一夫不獲是以不論民教一視同仁正直蕩平無偏無黨原欲百姓

親睦共樂時雍迭經通飭各督撫切勸導務使民教相安乃昨據河南巡撫錫良奏稱泌陽縣屬竟獨有焚燬教堂殺害教民情事業已降旨緝拿治罪因思嚴懲於事後兩敗俱傷何如消患於未然一勞永逸查西教入中國已二百餘年其宗旨本勸人爲善教士連涉重洋艱苦卓絕施醫療病賑濟貧窮非克己利人又何猜嫌之有而鬧教之案層見迭出法令森嚴亦且悍然不顧卽愚頑不應至此推原其故總由人心詐僞每有莠民藉入教爲名橫行鄉里倚勢作威無端構訟一不遂意則以厲受之愆使教士聞之不平代爲申理地方官平日既與教士隔膜又於案情曲折不能詳明剖辨遂成偏重之勢平民被抑積憤滋多匪徒藉此煽惑激成事變迨至釀案之後緝兇限迫則多被株連賠款罰嚴則不勝撙累此所以平民怨教之隱不能盡釋而教士勸善之心亦爲不彰是非彼此輯和盡泯嫌隙無以爲正本清源之策現在駐京總主教樊國樑宅心公恕見義勇爲前次覲見宮廷特加褒獎並令遇案持平俾民教相安於無事著外務部再將此意與樊國樑婉切商議使不安本分之人無從投教其教民犯案由中國官與平民一律辦理應如何安定規條杜絕後患並著外務部及出使大臣照會各國公使外部轉飭通行遵守兩有神益至各省教堂教士人等仍著各該督撫嚴飭地方文武各官懷遵前旨隨時防範實力保護如有貽誤決不姑寬將此通諭知之○慶親王奕劻大學士王文韶與俄國駐京公使雷薩爾議訂交

收東三省條約四款成其文曰 大清國 大皇帝與大俄國大皇帝願將於華歷光緒二十六年即俄
歷一千九百年在中國生出之變亂所傷鄰交復行敦固茲爲商議東三省各事 大清國 大皇帝特
派總理外務部事務和碩慶親王軍機大臣文淵閣大學士外務部會辦大臣王文韶爲全權大臣便宜
行事大俄國大皇帝特派駐華全權大臣正參政大臣雷薩爾爲全權大臣便宜行事該大臣等各以所
奉全權 諭旨查核均屬妥協會同議訂各條款開列於左 第一款 大俄國大皇帝願彰明與 大
清國 大皇帝和睦及交誼之新證據而不顧由東三省與俄國交界各處開仗攻打俄國安分鄉民各
情允在東三省各地歸復中國權勢並將該地方一如俄軍未經佔據以前仍歸中國版圖及中國官治
理 第二款 大清國國家今自接收東三省自治治理之際申明與華俄銀行於華歷光緒二十二年
八月初二日即俄歷一千八百九十六年八月二十七日所立合同年限及各條款實力遵守並按照該
合同第五款承認權力保護鐵路暨在該鐵路職事各人並分應保護在東三省所有俄國所屬各人及
該人各事業大俄國國家因有 大清國國家所認以上各情允認如果再無變亂並他國之舉動亦無
牽制即將東三省俄國所駐各軍陸續撤退其如何撤退開列於後由簽字畫押後限六箇月撤退 盛
京省西南段至遼河所駐俄國各官軍並將各鐵路交還中國再六箇月撤退 盛京其餘各段之官軍

暨吉林省內官軍再六箇月撤退其餘之黑龍江省所駐俄國各官軍 第三款 大清國國家暨大俄

國國家爲免華歷光緒二十六年即俄歷一千九百年變亂後來再行復熾且此變亂皆屬中國駐劄於
俄國交界各省之官兵所爲今令各將軍與俄國兵官會同籌定俄兵未退之際駐劄東三省中國兵隊
之數目及駐劄處所中國允認除將軍與俄國兵官籌定必須收剿辦賊匪彈壓地方之用兵數中國不
另添練兵惟在俄國各軍全行撤退後仍由中國酌核東三省所駐兵數應添應減隨時知照俄國國家
蓋因中國如在各該省多養兵隊俄國在交界各處亦自不免加添兵隊以致兩國無益而加增養兵各
費也至於東三省安設巡捕及綏靖地方等事除指給中國東省鐵路公司各地段外各省將軍教練專
用中國馬步捕隊以充巡捕之職 第四款 大俄國國家允准將自俄歷一千九百年九月底即華歷
光緒二十六年閏八月間起被俄兵所佔據並保護之山海關營口新民廳各鐵路交還本主 大清國
國家允許一設有應行保護該鐵路情節則專責成中國保護毋庸請他國保護修養並不可准他國佔
據俄國所退各地段二修完並養各該鐵路各節必確照俄國與英國一千八百九十九年四月十六日
即華歷光緒二十五年三月十九日所定和約及按照一千八百九十八年九月二十八日即華歷光緒
二十四年八月二十五日與公司所立修養鐵路借款合同辦理且該公司應遵照所出各結不得佔據

或藉端經理山海關營口新民廳鐵路三至日後在東三省南段續修鐵路或修枝路並在營口建造橋梁遷移鐵路盡頭等事應彼此商辦四應將大俄國國家交還山海關營口新民廳各鐵路所有重修及其各路各費由中國國家與俄國國家商酌賠償俄國因此項未入大賠款內兩國從前所定條約未經此約更改之款應仍舊照行此約由兩國全權大臣彼此簽押蓋印之日起施行並 御筆批准之未限三個月內在森彼得堡互換茲兩國全權大臣將此約備漢俄法三國文字各二分蓋押蓋印以昭信守三國文字校對相符惟辯解之時以法文爲本訂於北京繕就二分○壬戌諭軍機大臣等有人奏司員懷忠枉死懇恩昭雪一摺據樞工部郎中王煥襄辦黑龍江將軍戎幕多所匡益拳變事起壽山感於邪說不惟不聽該員勸阻反加殺害等語著長順按照所指各節確切查明據實具奏○錫良奏奴才接准部咨光緒二十八年正月十七日內閣奉 上諭政務處會同吏部兵部奏准遵議河東河道總督錫良賑陳河工變通事宜一摺黃河改道以來直隸山東等省修濬工程久歸督撫管理錫良原奏所稱漕米改折運河無事河臣係司堤岸撫臣足可兼顧等語該河督目擊情形自屬確實可憑所有河東河道總督一缺著卽裁撤一切事宜改歸巡撫兼辦其酌擬宜裁宜留及分別緩急各節均著照所請行仍責成錫良將裁併各事宜一手經理俟諸事辦有頭緒再行奏明請旨其裁汰各員弁及應裁兵丁著吏部兵

部隨時查明辦理至運河道現既裁撤該河督請將兗沂曹濟道移駐濟甯兼辦河工事務並河標城守營運河道屬運河營兩營弁兵應否裁留及此後運河修濬事宜著山東巡撫察酌地方情形詳議具奏欽此欽遵恭錄咨行前來奴才跪誦之餘仰見 聖訓周詳指示明切俾遵循之有自益欽感以靡涯遵將運河裁併事宜悉心籌畫並議裁河標三營緣由分案繕摺具陳至豫省黃河修防奴才蒙 恩調補河南巡撫仍屬責無旁貸益當矢勤矢勵督飭道廳實力籌辦務期款節工堅安瀾永慶斷不敢以身任地方於河工稍事疏略惟河務一切事宜有應變通者有宜仍舊者有應刪繁就簡以歸核實者謹就管見所及臚列清單恭呈 御覽所有河東河道總督關防奴才繕摺後即當敬謹封固應否恭繳候 旨遵行得 旨該部議奏單併發 籌議河工一切事宜清單 一河督關防應繳也查河道總督一缺現已奉 旨裁撤除衙署飭運河同知撥役看守所有冊籍酌量折道敬謹收藏外其河督銀關防一顆並王命旗牌等件自應恭繳抑或就近封存河南藩庫之處相應請 旨遵行此後河工一切公牘即蓋用河南巡撫關防 一黃河南北兩岸宜責成兩歸河北二道認真督防並擬將員缺酌量變通也從前河督專司河務兩道責成較輕現既歸併巡撫兼管所有河工一切事宜不得不責成兩道認真督辦嗣後每屆伏秋大汛撫臣仍不時臨工查勘指畫機宜並飭兩道分駐工次協力巡防遇有應辦要工隨時

相機策應但從此兩道尤須得人庶幾指臂之助查現任開歸道穆奇先河北道馮光元皆係老成幹練之員倘此後遇有更替洵非熟悉河工耆弗克勝任而南岸險工林立尤爲喫重擬請因時變通將開歸陳許道一缺改爲外補要缺遇有缺出由撫臣專選熟諳河務人員不論班次酌量或升或補抑或開單請旨簡放應請 飭部核議酌定以重河防 一八廳修守應仍照定章辦理也河工自前河臣許振祿改章後歷年辦理著有成效嗣經前河臣任道鎔復加釐定委無流弊應請一切仍照舊章辦理 一歲修工款擬請開單奏銷也查河工用款向係每年霜降後奏送清單奉部核准後復再題估准估後始行題銷夫以已准之案輒再一估一銷本屬重複況題本現已停止若逐件改題爲奏亦屬煩瑣伏查河防另款經前河臣許振祿奏准開單報銷免其具題歷年遵辦在案歲修事同一律擬請自本年爲始改爲與河防另款一體開單奏銷以省案牘奴才仍當嚴加旬稽實用實報不准絲毫浮冒此外如比較上三年銀數多寡關繫稽核錢糧應仍照章辦理其餘一切例案冊圖凡屬具文概行刪除用昭核實所有近年尚未題估題銷之案皆係已奉部臣核准之款應請一併免其核辦 一河南河工擬名豫河也東河河工現既分隸兩省自應另立名目擬名河南河工曰豫河以免混淆 一河工候補人員應分撥兩省並擬酌量推廣也東河豫河現既分隸山東河南各巡撫兼管所有候補人員應分撥兩省除例應迴

避本籍者山東人專管河南河南人專管山東外其籍隸外省人員應聽其於山東河南兩省自行指定
一省專補河工之缺惟東河既已裁併而運河各缺又復大加裁減候補人員殊形擁擠可否量爲推廣
如有願改他省歸地方者聽其另行改指一省稟請咨送部核其關官一項地方無缺可否准其對品請
改典史等項按照原班補用仍免繳離省指省捐項各銀兩以示體恤應請 飭部一併議覆施行 一
河工人員補缺應仍照定章辦理也河工候補各員向係分隸各道當差此道當差之員彼道並無名冊
與地方人員總匯於藩司者不同是以每遇補缺向由河臣核定並不由道具詳現雖改歸巡撫兼管而
河工人員專補河工之缺仍與地方有別擬請嗣後豫省河工遇有缺出仍由撫臣酌定應補人員分別
奏咨辦理毋庸由該司道等會詳以符定章至輪補班次仍應查明上次用至何項按班接續序補 一
大挑知縣請免發東河也每遇大挑之年向有分發東河知縣二十員或十六員不等到工後試用二年
期滿分別甄別留工並將不諳河務者改撥地方查河工並無知縣員缺其留工之員祇能借補佐雜已
屬向隅現在東河既已裁併嗣後大挑一等人員應請免其分發山東河南兩省河工俾人才不致屈抑
一運河事宜應歸山東撫臣接辦也東河撤河現既區分爲二河南撫臣專管豫省黃河其運河一
切事宜應歸移交山東撫臣接辦惟巡撫各管一省與河督兼轄兩省者不同此後東省陳奏運河事件

及請補沿河各缺應毋庸與河南巡撫會銜以歸簡易○癸亥祭 先農壇 上親詣行禮○諭軍機大臣等景星奏船廠勢難兼顧請派專員一摺四川補用道沈翊清前已賞加四品卿銜派充會辦四川礦務商務大臣茲據該將軍奏稱船政關係重要總督將軍皆有職守勢難常川赴工必須另派專員以資統攝自係實在情形沈翊清著暫留閩省會辦船政藉資熟手○裁撤河南黃河通判二缺汛員十二缺間官八缺歸併同知二缺通判二缺汛員一缺間官七缺○甲子諭軍機大臣等朕欽奉 慈禧端佑康頤昭豫莊誠壽恭欽獻崇熙皇太后駐蹕南苑隨從人等向穿行衣其各衙門值日人著照常服色○諭給事中桂斌等奏請將留署擬事人員酌給獎敘一摺內務府各司員昨已據該大臣酌保如有應保之員亦准併入該給事中等僅司稽查何得率行奏請著不准行○諭京察記名人員將次簡放完竣著內閣部院各衙門於京察一等未經記名各員內遴選才具優長者出具切實考語保送由吏部帶領引見○諭向例領侍衛內大臣帶領豹尾鎗護從鑾輿理宜嚴肅近年往往擬雜擁擠殊屬不成事體此次啟鑾著御前大臣領侍衛內大臣認真整飭應行隨從人員外其餘均不准擅行闖入以昭嚴肅○諭御史吳鴻甲奏司坊練局羈累無辜請飭申明章法一摺五城設立練局巡查地方禁押兇犯例有明條向不准羈押無辜致干例禁若如該御史所奏路斃之人不令收殮反羈押苦主需索多端種種弊竇實出情

理之外著五城御史嚴密稽察隨時禁止倘有前項情弊即將該管司坊官從嚴參處另片奏盜賊平民共繫一室一任狡詐索及命案延擱不驗反將原告羅累需費各等語一併嚴行查禁以重民命而安閭閻○丙寅陳夔龍奏維安民之道莫先養民既庶何加必曰富教所謂無曠土無游民此卽致富自強之道也自元明以來丁壯逐河漕之利河流北徙漕運改寧向之千指萬插者今則悉成游手窮而爲盜取得幾微罪至斬梟不能禁止其情形亦甚可憐非多籌食力之方使之各有所事則地方官覓嚴俱難措手茲擬於江城外設立種植牧養工藝公司藉以安戢游民消弭隱患種植之事辨其肥料備其器具耨其水田溝洫則天地所生成小民所勤力者皆可以學人之心思而敦僭徒之利至於通海之植棉杭湖之種桑雖不如西國之有專學亦各以鄉父老所相承者爲秘訣而牧養一道最爲致富良國其所資以餽養之者往往取人之所棄於農事有相資之功無相擠之害而辨種防弊西人已有經驗專書可以採用前史所載西北逐水草之利有以山谷畜牛馬者畜牧可以立國寧息豈曰小補今蒙古游牧僅存遺意淮海荒地詎云不宜至於麥桿爲帽邊今爲出洋大宗蒲麻可以打包蘆葦可以結屋棚木宜於餵鴛螺蛤用以煨灰此皆淮海之可資手藝以食力者就蘇省而論南北一江之隔樂苦奚啻霄壤雖地有肥瘠亦判乎人之勤惰江北河海灘雖經幾次開墾但墾時已久復漲者有之荒蕪者有之民情

既情於力而復商於財是以利業於地公司之設必官謀所以補助扶提之而以本地股實紳商爲之先導臣督同淮揚海道沈瑜慶設法籌措先爲倡率數月以來仿造洋胰子洋針洋手巾各貨並購地租桑製機織布次第舉行人情亦尙觀感興起一面招精於西法測繪之人將河湖海三項灘地擇要繪圖除前已招領輪租外餘均集商承領招工試墾期其日起有功各屬如能仿行漸推漸廣荒地不致終荒游民可以逐漸減少其有能以本地土產製成器用者或本地所無之物而其人之心思靈巧能創製者則給以專利憑限以資鼓勵江北向未出絲茲既勸其從事蠶桑擬援通州海門辦過成案暫免納捐數年在釐局爲向所未收之捐免之於收數並不見短在地方爲現所創辦之事寬之則得惠可以漸廣以上粗具大端其餘條目仍歸紳委悉心籌議由臣隨時核定分別准行但使一人每日可得百錢合全淮數十百萬之人以計之其樂利當未有艾間閱多一生計卽罔罔少一罪人淮海窮民稍紓苦累仰戴 皇仁何有既極得 旨辦法甚善著卽認真經理以惠民生○丁卯諭朕此次恭謁 東陵所有踴路經過之大興通州三河薊州遵化五州縣地方應徵本年錢糧著加恩豁免十分之三○盛宣懷奏臣辦理蘆漢鐵路就上海設立總公司奏准撥發官款以爲全路基礎津漢兩端各設分局派員綜理應將辦法大概情形奏明在案伏念京蘆至漢口鐵路跨越三省體大物博非籌借洋款無以竟工非酌撥官款無以

固本臣受任之始借款未成先與英工程司訂造蘆保一段計正路二百三十四里四成五分按照雙軌
購地填土爲將來開拓張本目前先安單軌另築周口店運石枝路計長二十七里大成連同幹枝路內
輪車往來相避岔道接長四十里五成三分共計軌長三百六里五成八分歐西路工繁簡以沿途橋梁
大小多寡爲斷直境各河岔道如渾河琉璃巨馬河等處有寬至一千六百餘尺者此外細流巨浸均關
畿輔水利不容稍有防遏計蘆保一段幹枝兩路共修鋼橋九十一座接長至一萬一百十有七尺京津
各橋工無此艱鉅此外車站道房機廠料廠及一應大小西式房屋並轉盤水櫃電綫等工應有盡有不
能枚從簡略所辦外洋材料皆照工程司細帳開標定價擇廉訂購各洋商領價洋單隨時簽字作據各
段匠夫工價並內地購辦料物悉令檢同洋單隨冊併送津局核支按月轉報總公司派員覆核開辦伊
始道遠運艱應用洋料從寬購備核計蘆保工竣所存各項料物照原價約估尚值銀五十餘萬兩悉歸
北路接展保正路工等用鐵路爲中國創辦之舉向無例案可循前督辦關內外鐵路臣胡燏棻奏銷黃
榆兩路報銷經兵工二部奏奉 諭旨歸併總理各國事務衙門會同總辦鐵路事務大臣核實辦理欽
此欽遵在案蘆保報銷事同一律據委辦上海總公司購料處候選道朱寶奎委辦天津工程轉運局直
隸候補道張振惠等督同總公司造冊處委員核造蘆保鐵路四柱收支總細各冊開具簡明清單詳請

奏咨核銷前來臣詳加覆核其收款項下總公司承領南北洋官款英法借款昭信股票官款德華續借英德餉款共計四次實領折合庫平銀九百三十五萬六百四十八兩有奇又蘆保路成開車日起截至光緒二十六年八月亥成比員經理日止所進車脚制錢折合庫平銀十二萬七十五兩有奇二共實收庫平銀九百四十七萬七百二十三兩四錢一分一釐七毫開除項下蘆保路造車地價工料以及鐵路學堂補修鐵路共計四項實支庫平銀五百四十二萬六千五百七十兩三錢六釐又另冊請銷總公司華洋員司薪費賸助蘆漢全路經費南端漢辦官辦料件共計三項實支庫平銀十九萬五千四十兩一錢七分八毫統計勛支經費庫平銀五百六十二萬一千六百十兩四錢七分六釐八毫餘存官款接續撥支並另案奏辦淞滬鐵路及預支漢廠軌價維持鐵政以塞漏卮自應接續造銷各清各款除清冊咨部外謹援案繕具清單恭呈 御覽仰懇 天恩飭下外務部戶部暨路礦總局查核准銷得 旨該部核議具奏單併發○戊辰 上詣 獨樂寺拈香○上奉 慈禧端佑康頤昭豫莊誠壽恭欽獻崇熙皇太后祇謁 西陵啟鑒○己巳諭軍機大臣等有人奏請提調署旗進各款就餉練兵一摺據稱清署歲收撥金蘆葦雙價並准湖海各灘租及江寧協濟等款統計有五十萬之譜近年以來積弊甚深悉歸中飽請飭就此款另募新兵卽練洋操等語著陳龍按照所陳認真整頓察酌情形妥籌具奏另片奏請

裁南河允員等語該漕督一併議復原摺片著鈔給閱看將此諭令知之○庚午諭朕於明日穿行衣
由隆福寺行宮乘轎至朱華山親臨 端慧皇太子園寢奠酒畢乘轎至倭子山南中伙少坐乘轎至桃
花寺拈香畢乘轎迴桃花寺行宮早膳畢等候詣 皇太后前跪接畢隨從辦事召見畢駐蹕於辰刻伺
候○諭朕於明日穿青長袍褂詣 皇太后前請安隨從辦事召見畢乘轎進西峯口至 普祥峪 定
東陵至東朝房南金殿更禮服乘轎至 隆恩門外下轎步行至 隆恩殿行大筵禮畢步行至 隆恩
門外乘轎至東朝房 南金殿更青長袍褂畢乘轎至 隆恩門下轎步行至 明樓前行禮畢奠酒步
行至 隆恩門外乘轎至東朝房南金殿更行衣畢乘轎至 普陀峪中伙畢至 普陀峪宮門外等候
瞻仰畢乘轎至西峯口還行宮等候跪接 皇太后駐蹕均辰刻伺候○辛未諭此次啟鑾御寶匣內有
書寫長至表文字片擇寶之內閣學士文海未經查驗寶匣疏忽著交部議處○甲戌諭詹慶三奏請飭
催臬司赴任等語湖南按察使黃建筵著即遵旨來京陛見後速赴新任○以蔣宗漢為貴州提督調黃
金福為貴州安義鎮總兵以吳長純為直隸天津鎮總兵○以秀昌為奉天錦州副都統○乙亥鑄良奏
奴才於光緒二十七年十一月二十七日承准軍機大臣字寄十一月十八日奉 上諭慶親王等奏管
辦鐵路務請飭開辦以保利權一摺山西河南鐵路亟應早自開辦著岑春煊鑄良遴選殷寶公

正紳面迅速定章督飭妥爲籌辦以免利權旁落原摺著鈔給閱看將此諭令知之欽此欽遵寄信前來
奴才查光緒二十七年十一月初二日據修武縣詳稱轉據福公司總工程師柯瑞豫公司幫董方鏡
兩開勘明修武縣境之老流河左右礦產並擬修造轉運支路由該礦地起經修武禮縣新鄉至衛輝之
道口鎮止擬定今春開辦並將圖一併申送前來前據臣未及核准移交奴才查與此次奉旨開辦
礦務係屬一事恐出兩歧又兼豫省素乏熟悉礦務之員卽於十一月二十八日電達軍機處代奏請
旨飭下前據臣松壽辦理路礦大臣張翼就近酌商辦法以期周妥准軍機處電傳奉旨照辦欽此嗣
於本年正月二十日據福公司總辦哲美森來電以修武老流河礦產請發憑單復准外務部電轉據英
使照稱福公司工程師柯瑞勘明修武縣屬之老流河左右礦產請發憑單應飭查地方情形果無窒礙
卽行給單開辦並酌派員紳照料各等因奴才查前據臣等雖未議覆辦法未便遽延滋誤因卽委派豫
豐公司幫董方鏡妥爲照料一面飭查老流河左右地方有無窒礙尙未覆到旋於二月二十四日准署
兵部左侍郎松壽咨稱河南礦務已奏准由奴才妥辦並聲明原辦紳商吳式釗撤退一時接辦無人應
任遴選官紳妥爲接辦奴才當將交涉局司道等詳加遴選惟查有候補道韓國鈞才長心細通達時務
堪膺斯任卽行派充豫豐公司總辦以期內外聯絡兩無隔閡又於二月二十五日准外務部咨稱福公

司承辦懷慶左右黃河以北諸山各礦奏准有案應飭屬查明果於地方情形無礙卽行給發憑單以待
原議所稱由修武縣至道口鎮修造支路轉運礦產一節應察看地方情形另行核議奴才伏思福公司
迭次請發憑單自以查明果於地方情形無礙爲合同第一款內緊要關鍵飭催該道府等迅速查覆茲
據懷慶府知府傅傳霖轉查得老流河左右煤窯鑛次小民自行開採藉謀營生若礦務一開必致有
妨民業雖礦丁多用豫人而計工授食究不若自行開採足贖身家且附近祠墓甚多不無窒礙等情除
由奴才再飭該屬體察情形詳細查覆並剴切示諭但於地方無礙卽行給發憑單外所有委派豫監公
司總辦並酌派員紳暨督飭搜查各緣由謹恭摺具陳下外務部議奏○丙子諭軍機大臣等有人奏江
南蘇松常鎮揚通一帶鹽場林立劫人勒贖上年正月間武進陽湖並有仇殺至百人之案通州海門等
屬藉友家丁執法營私等語江蘇地方緊要沿江島會各匪尙多全賴吏治整飭消患未萌著劉坤一按
照所指各節認真查辦據實覆奏毋稍徇縱原片著鈔給閱看將此諭令知之○諭吏部奏宗人府理事
官恩麒應否帶領引見等語戶部郎中陳宗煥工部主事趙從蕃兩案均係保薦人才特旨交部帶領引
見至尋常各衙門行走人員當差勤慎本職所當爲所請應否帶領引見之處著毋庸議○丁丑盛宣懷
奏自中外互市以來中國銀錢流出外洋不少惟賴出口土貨藉以稍補漏卮土貨之中向推絲茶爲大

宗而茶葉則分紅綠兩種紅茶在湖北之漢口行銷綠茶在江蘇之上海出售從前外洋不識種茶之法各國非由中國購食不可彼時茶值甚昂不論貨之高低率勻計算每擔可售五六十兩至七八十兩不等是以茶葉稅則亦不分別貨色定爲每擔抽稅二兩五錢按值百抽五之例原屬相符迨印度錫蘭出產紅茶日本出產綠茶以後悉用機器製造價本既輕印度日本又免徵稅銀錫蘭不特免徵每磅并津貼銀三分五釐約合每擔津貼銀四兩之多力使暢銷推廣中國產茶雖戶則踴常豐故於種植焙製各法未肯請求商人因銷路日疲或相率作僞或貶價求售茶盤遂至逐年遞減漸成江河日下之勢臣宣懷前奉會辦商務大臣之命卽准原任大學士李鴻章咨據駐滬考察商務委員汪其昌稟報茶葉一項年年減數酌認真整頓設法挽回並探聞印度茶葉由雲南侵入內地者不下一萬餘擔若緬甸鐵路一成來源既易非但中國出口茶葉漸少恐中國銷用印度之茶反年暢一年惟有減稅輕本免絕生機正在核辦間適奉 旨議辦商稅事宜接准英使馬凱開送商約大綱二十四款內第九款卽以減輕茶稅爲請並據在滬茶商甯事梁榮翰等聯名呈稱咸豐同治年間所售紅綠茶價甚高每擔完出口稅銀二兩五錢商力尙可支持近來銷滯價跌紅茶最高者爲祁門寧州綠茶最高者爲婺源平水每擔售價不過四五十兩其次之各種低茶售不及二十兩加以內地所完落地稅釐金等項幾於十取其二際此

重修稅則懇請體恤商艱當經飭令籌辦商約之稅務司裴式楷實地運載藥商查明核議去後茲據該稅司等先後查得該商董所呈均係實情並以中國運英茶葉同治十年尙有一萬三千九百萬磅錫蘭茶僅一千五百萬磅至上年中國茶祇有一千八百萬磅錫蘭茶則增爲二萬六千四百萬磅又中國運俄茶葉光緒二十九年尙有五千萬磅錫蘭茶僅一百五十萬磅至上年中國茶祇有三千一百五十萬磅錫蘭茶則增爲一千萬磅卽以中國近三年出口茶數而論光緒二十五年尙有一百一十四萬九千餘擔二十六年祇有一百零六萬三千餘擔二十七年則僅有八十五萬四千餘擔比例參觀是洋茶日盛華茶日減恐四五年後無人過問亟應設法補救等情具獲前來臣等公同商酌再四籌維國計民生均關重要當茲時局艱難賠款無出尙何敢輕言減稅祇以目擊茶銷壅滯商力困疲若再不亟圖維持微獨華茶不能行銷於外洋轉恐洋茶得以充斥於中土與其將來稅釐全失計莫如暫爲減稅使成本稍輕銷場漸旺數年之內出口茶必加多其稅自可抵減徵之數尙期收效桑榆誠屬兩益辦法臣等本擬待商約定後再行請減惟洋茶銳意攘奪華茶年少一年愈趨愈難補救現值茶葉將次上市若再不因時量減坐使銷數日短稅於何有徒令茶業商民俱失生計無可挽回此實關係商務至大至急臣等職司商稅何敢默然相應懇 聖明飭下部臣轉飭總稅司卽將出口茶稅改爲按照市價值百抽五

於定章並無違礙庶幾 恩出自上商困得以稍紓商情必形鼓舞目前暫少茶稅客等與稅務司設法於別項出口貨稅加增藉以抵補並請湖北湖南江西安徽浙江福建產茶各省於茶葉一項減稅之後不可再行加釐俾免滯銷而維大局得 旨外務部妥速議奏○己卯隨廉奏奴才於光緒二十七年十月間專摺奏派前湖南候補道周冕為鐵路交涉總辦前往哈爾濱與鐵路總監工商辦交涉事宜十二月十四日覆回原摺奉 硃批外務部知道欽此欽遵在案當該員赴哈爾濱之初其總監工茹格維志等先以從前派員未協並未保護為辭意在請難經周冕極力辯白於是總副監工等援照吉林新訂章程酌改釐章擬有合同十一條周冕詳加斟酌刪其窒礙不符之語而於黑龍江省關繫重要之處量為增入再三商辦草議章程十二條該總監工等派其代辦達爾翰偕同周冕實送到省經奴才核定議查章程內載哈爾濱設立總局各段監工處派專員設立分局均歸總局節制所有局中經費仍照舊章由該公司籌給津貼惟前次設局專管鐵路交涉此次該總監工等所擬凡關涉鐵路及牽涉鐵路之命盜雜案均須歸局經理免致移交地方官會辦轉多遲誤奴才查鐵道橫穿黑龍江省二千餘里惟呼蘭齊齊哈爾呼倫貝爾三處離城較近此外或千餘里尚未設官或數百里本無村堡遇有案件不但該公司患其周折即奴才與各城副都統亦均有鞭長莫及之虞蓋鐵路一通中外維處較之從前治理旗

民其繁簡離易迥不相同故當鐵路干涉之事悉歸鐵路交涉局經理如其事情重要及罪關流徒以上均案由奴才駁奪似於江省情形較為妥協且亂後通事之害最烈故章程內必先提清名目以免日後遇事狡脫庇護至鐵路公司購買應用地畝以前未經稽核曠土太多尤易私佔並風聞有奸民嗜利暗中指地售與俄國商民情事所以此次定章再三磋商增入一條聲明無論滿漢之官地公地私地凡係鐵路購買均將各色契據送由鐵路交涉總局驗明蓋印既為補牢之策而現在鐵路兩旁趕緊招墾冀可以嚴稽察而免輾轉此奴才派員總辦鐵路交涉察覈章程增設定議之大致也其各局一切經費俟議定報明立案待 旨外務部路礦大臣議奏片併發○陳廉奏光緒二十二年七月二十日原訂東省鐵路合同第六條業經准其開採各礦是東省礦務係屬該公司已得之權此次商訂鐵路兩傍開礦章程經奴才督同前湖南候補道周冕竭力磋磨作為專指煤礦別項礦產不在其內查原訂合同有開出礦苗處所另議辦法等語可否請 旨密飭外務部路礦總局於另議開礦辦法一律聲明專指煤礦而書藉可自保利權免致漫無限制惟鐵路兩傍三十里開煤礦一節該公司恃原訂合同鐵路附近一語轉要挾恐其再援吉江兩省成案又復要挾他處且恐各國援援鐵路章程別有需索之處皆不得不預為防範奴才考泰西通例凡外間立合同若非經國家給予全權如其有關大局均可由政府駁詰

更改此次江省撫卹吉林興鐵路權讓煤礦草約應請 敕下全權王大臣等詳加覆核以期妥協得
旨覽○庚辰諭朕欽奉 慈禧端佑康頤昭豫莊誠壽恭欽獻崇熙皇太后懿旨慶親王奕劻著管理頤
和園事務○諭御前大臣管理奉宸苑事務慶親王奕劻總管內務府大臣世續乾清門侍衛奉宸苑
訥欽奉宸苑卿都慶南苑郎中常恩預備南苑等處行寓差務一切妥協奕劻世續訥欽奉宸苑均
著賞加一級常恩著賞給小卷江綢袍褂料一套並著賞給紀錄一次○袁世凱等奏光緒二十七年十
月初七日奉 上諭津榆鐵路應趕緊設法收回添派胡燏棻會同辦理先將接收事宜悉心商議妥籌
辦理又於十二月初一日奉 上諭關內外鐵路事宜改派袁世凱接收督辦胡燏棻會同辦理等因欽
此欽遵當與英使薩道義一再商議英使以該鐵路統由兵隊作主雖現歸英國武員管理而實則各國
均寓權力祇可從容籌商退還嗣經迭次商催直至本年二月二十四日始准送到英武員交還鐵路章
程九條前代中國招股之中英公司所擬章程八條復經臣等面商頗有應行辯駁之處是月二十九日
臣袁世凱來京臣胡燏棻彼此會晤公同酌改迭與英使再四磋磨始克就範現已由英使函致英提督
及中英公司均無異詞原議英武員商訂章程九條嗣經改定以後由臣等添入電綫一款統共十條中
英公司原議八條一再刪改併成五條內有允留武員一款係承上年和約留兵駐守專辦運載軍實而

言此外均與聯軍未佔以前無異自難讓阻其中英公司所訂第一條派有總管一員專管工程料物事宜並添派員一員現仍指定統歸督辦大臣節制不致權落人手第五款原議應派中英公司在倫敦代辦購料一切事宜涉攬利現改為購買車輛材料仍用開標辦法大致均屬和平尚無流弊等悉心酌覈議款一經定局鐵路即可早日收回英使初擬於西歷五月初一日即中歷三月二十四日將路交還現因疊次往還函商為日已促且查押以後尚須照會各國公使並檢閱俄國所佔車站等項一條非一二日所能成事英使擬改至西歷六月初一日即中歷四月二十五日交還決無異議茲將英使送來改定英武員與中英公司交還鐵路商訂華洋章程二分繕具清單恭呈 御覽如蒙 俞允等遵即會同畫押以便布置接收鐵路各項事宜庶幾官商貨物往來並運漕運兵均可便利實與大局殊有裨益得 旨允行○辛巳任道鎔奏准戶部咨本年具奏新定賠款合力通籌分撥攤還一摺光緒二十七年八月十六日奉 旨依議欽此嗣印原奏開列擬裁擬增各款通行各省妥速籌辦有與該省窒礙難行之處自可因時變通並准就地設法等因遵經督同司道實力設籌先於報解第一期新約賠款案內將籌辦各捐聲明在案浙省迭遭災歉民力未紓臣未敢操之過蹙而賠款按月提解籌備不容稍延數月以來辦理已粗有端倪今將各捐大致情形分別陳之一曰糧捐各屬應徵地漕錢糧除荒歉缺額

及因災蠲緩外自光緒二十八年上忙起無論新舊一律按照實徵之數每兩加錢三百文隨糧帶徵一
曰鹽斤加價按現官價值每斤加錢四文將來集有成數仍由行銷各地分去二文其二文留歸浙省一
曰鹽引加課兩浙各屬按照行銷引數每引由商加課銀四錢隨鹽帶繳一曰房捐各屬城鄉市鎮凡係
舖戶引店所居房屋於逐月租值十成內捐錢一成房主租客各半分出委員遍查給照收捐一曰膏捐
洋藥土藥熬膏濟膏所在皆是各屬城鄉市鎮無論土店煙鋪膏膏一兩收捐錢二十文委員會同地方
官遍查給照收捐一曰酒捐酒爲浙東出產大宗而釐捐並無起色照部章再加三成亦屬無濟已委員
分赴各屬會同地方官妥議簡要章程查明釀酒缸數再以缸計釐給以印花執照每年釀至五十缸者
繳納照費洋十元於售銷時分別本莊路莊兩項黏貼印花本莊售諸本地每百斤繳捐洋二角路莊運
往外路加繳二角免其完釐先由紹屬徧查試辦已有端緒以上六項皆查照部章察度地方情形因時
變通就地設法辦理惟章程甫經議定如有未盡事宜仍當隨時隨地酌量妥辦此外如錢鋪典當牙帖
契稅現併飭司分別籌辦據布政使誠勸鹽運使黃祖絡會同鹽捐局司道具詳前來臣查奏派新案賠
款一百四十萬兩加以本撥無著另款銀十餘萬兩數鉅期迫均在常年出入各款之外現辦各捐歲收
計有若干是否足數抵解尙無把握惟有督同司道嚴飭承辦各員潔己奉公妥爲籌策斷不可竭澤而

漁亦未便因噎廢食以期上紓 國計下卹民生得 旨著即妥籌辦理總期裕餉而不擾民○壬午

上奉 慈禧端佑康頤昭豫莊誠壽恭欽獻崇熙皇太后還宮○癸未 上詣 奉先殿 壽皇殿行禮

○乙酉諭軍機大臣等有人奏知州貪虐昭著請旨嚴查一摺據稱署易州知州馮清泰前經被人參劾
與世凱查覆聲敘含糊請飭該署督再行秉公確查等語著袁世凱再照所指各節確切查明據實具奏
毋稍迴護原摺著鈔給閱看將此諭令知之○諭軍機大臣等有人奏參署滄州知州正任安州知州商
作霖貪鄙糊塗劣跡多端等語著袁世凱按照所參各節查明擬奏毋稍迴護原片著鈔給閱看將此諭
令知之○福州將軍景星以病免○袁世凱等奏天下大勢幾同戰國交鄰之道關係絕重因應之當否
而事機之得失國勢之安危判焉故環球列邦競長爭雄莫不於交涉人員倍加之意其未用也皆儲之
有素其將用也必採之藝精其既用也又委之甚專而任之甚久凡屬外部應出使各員既設為額缺復
互相調用其居外部者大半曾經出使其任出使者率多選自外部二者交資輪替出入職地雖異事寄
則同終其身周歷乎交涉之途於本國之局勢及外邦之情形無不爛熟胸臆而其人又率皆習各國語
諳文字彼此聯絡情志易通過事見機多佔先著利則陰為規取害則預為防維故外部與出使兩途各
國均視之極重從無以花翎杆格者廁其間也中國今日創鉅痛深積弱已甚列強環伺事變難知措置

之機重堪偶誤權力雖難並競公理尚未全泯而宜慎選辦理交涉人員妥定章程使其出入中外互資閱歷事以經練而日習材以造就而漸多冀可得人分任因應咸宜潛消陵侮之萌預杜侵伺之患時務大政莫要於此擬請嗣後外務部司員各缺由出使各國大臣所屬參贊隨譯各員中精練久在外洋者出具切實考語保送外務部考察充補如慮不敷暫准由沿江沿海各督撫精練曾經出洋之員或遊學或學生確有考究者一體保送外務部酌量選用如缺之外可作為候補其使館參隨各員缺由外務部精選品端學優能通洋文之司員前往充補如慮不敷暫准由翰林部屬府屬州縣通洋文願出洋者呈由外務部考察一體選派如缺之外亦可作為候補概不准以洋務隔膜之人濫與其選五年以後人才日多外無濫竽之參隨內無隔膜之司官則專以使館外務部人員互相調補而已足矣至使館參隨等員尤宜改作實缺久於其任除由外務部調用及有事故遣退外概不准出使大臣隨意攜帶並無故調換有時使館受代所屬各員仍各照舊供職仿照各國遣使通例立限給假休息派員代理缺俸仍照假滿復充三載考績按書記繙譯隨員領事參贊等缺擇取卓異依次遞升出使大臣有缺亦可於參贊中遴員請簡務使人人久於所事情意專得以考究所駐之國風土人情及一切政治利弊與其意嚮動靜隨時刺探詳報外務部庶外務部與使員呼吸相通氣脈貫注雖隔萬里如聚一堂自可內外協謀

算無遺策而出洋各員更事既多歷時既久不但勝任愉快且可應變適機其無形之維持與隨時之補救裨益尤非淺鮮臣等以時艱日棘交涉才難事關國計安危斷難臨常習故必須變通成法以期得人而資補救往復籌商意見相同用敢不避越俎之嫌冒瀆 聖聽仰懇 宸衷獨斷決意施行大局幸甚從之○丁亥諭軍機大臣等此次京察一等復帶引見各員著自本月二十九日起按照名次先後每日二員於寅刻赴乾清門伺候召見於本日未經召見仍於次日預備遇有出宮行禮拈香等日期應行預備召見之員毋庸呈遞牌仍於次日預備召見其餘各員以次遞推○諭袁世凱奏稱直隸屬宗縣屬匪首景廷賓聚眾煽亂經擊散乃該犯逃匿鉅鹿布散符咒糾合匪黨分投襲奪戕官弁委員汛兵至五十餘人之多又謀據廣宗威縣兩城並有攻毀教堂搶掠教民情事本月十九日有法國教士羅澤浦中途遇匪被害已飛飭各營趕即撲滅並令覓獲該教士屍首殮卹等語匪犯景廷賓左道惑人謀為不軌著袁世凱迅即添派營隊將該匪首擒獲盡法懲治將餘匪從速剿滅務絕根株教士羅澤浦無辜被害深堪憫惻著妥為殮卹仍將各屬教堂及教士人等實力保護毋稍疏虞此次疏防地方文武官弁著卽查明分別奏參以示懲儆○劉坤一奏竊奉 上諭各省制兵防勇耗餉頗巨飭令悉心規畫核實釐剔除夙稱得力及練習洋操著有成效者毋庸裁撤外所有各省原有之綠營防勇裁去十之二三上年

有事時添募之勇營亦一併酌量裁撤等因欽此又奉 上諭著將原有各營嚴行裁汰精選若干營分爲常備續備巡警等軍認真訓練以成勁旅等因欽此仰見 朝廷整軍經武實事求是下懷欽佩莫可名言伏查江南各防營屢經裁減爲數本已無多向係練習德操疊次奏明在案光緒二十六年夏間北事驟起人心洶懼沿江等處情形亦岌岌可危屢奉 諭旨籌辦防務維時餉項艱難而軍情日緊不得已將改旗各軍補足成營並增募新勇分地扼守藉以綏定人心一面奏准開辦籌餉捐輸湊撥濟用迨上年和局告成餉需不濟當經分飭次第裁減妥爲遣散計裁左右哨親兵一百名護軍除中營外止副八營改旗裁勇一千七百一十二名新湘五營改旗裁勇一千七十名盛字除中營外其餘四營改旗裁勇九百五十六名合字除中營外其餘四營改旗裁勇九百五十六名撫標滙軍營裁勇一百名奇兵左右二營改旗裁勇四百二十八名南字三營改旗裁勇六百四十二名樞字二營一千全裁新募除防馬步七營先飭改旗嗣又全裁計勇一千名自強軍馬步礮隊裁勇八百八十四名督標練兵裁去八百九十五名提標練兵裁去三百五十八名狼山鎮標練兵裁去八十六名又勇丁一百名准揚鎮標練兵裁去一百二十名統核防營練軍及添募新勇共裁一萬三千六百五十七名現存各營或數百名或千餘名零星分布委難再行議裁自強軍已奉調赴北僅有武衛先鋒左軍及江勝軍各三千人此外並無大

枝現經臣飭將武衛先鋒左軍作爲常備左軍江防軍作爲常備右軍屯紮訓練以備遊擊之用其吳淞之盛字五營旗江防之合字五營旗兩字三旗鎮江之新湘五旗江甯之護軍九營旗上海及十二圩之奇兵左右二旗隊防步隊三營馬隊二營宿遷一帶之銘字馬隊三營元字步隊三營鎮字步隊一營營標水師前左二營新勝水師一營蘇防五營親兵一營均作爲續備軍分紮原處以資防衛各標練兵本由制兵挑選而成應作爲巡警軍又太湖水師本應作爲續備因該營分駐蘇松等五屬巡護釐卡亦應作爲巡警以上各營旗經此次裁定之後責成該統領管帶等官督率弁勇一律換用新式鎗礮認真練習務使兵有實用餉不虛糜仍由臣等嚴密考察如有積習未除虛糜故事者隨時參辦不敢稍事姑容勇餉本不爲薄皆可毋須額加至裁減制兵一節事關三省辦法應歸一律經臣酌定章程並電商三省撫臣漕臣一體通飭遵辦大致照額減去二三成汰弱留強不分馬步戰守一律改爲守兵裁存之兵於原餉之外酌量加給卽以裁節之款抵支並酌裁千把以下冗弁俾資節省繼以化無用爲有用方不失設兵之本意裁定後一併作爲巡警軍事關更改營制端緒亦極紛繁容再另行專案會奏得旨著卽督飭認真訓練仍隨時考察務令掃除積習足成勁旅○庚寅諭增祺著加恩開復革職處分該將軍務將營後一切事宜悉心經畫妥慎辦理以副委任